

AKUERDO DI GOBERNASHON



REALISANDO E MÁKSIMO POTENSIAL DI
KÒRSOU

Un akuerdo di gobernashon ku atenshon
spesial pa enseñansa, formashon i
kombatimentu di pobresa.

KONTENIDO

PRÓLOGO	6
INTRODUKSHON	9
1 Enseñansa, Edukashon i Formashon	9
2 Famia i Komunidat	10
3 Ekonomia i Trabou	11
4 Salubridat i Medio ambiente.	11
5 Bon gobernashon	12
1 ASUNTUNAN GENERAL (AZ)	13
1.1 Bon Gobernashon	13
1.2 Relashon den Reino	13
1.3 Integridat	14
1.4 Struktura estatal	14
1.5 Komunikashon i informashon	14
1.6 VDC	14
1.7 Relashonnan eksterior	14
1.8 Refineria	14
2. ENSEÑANSA, SIENSSIA, KULTURA I DEPORTE (OWCS)	16
2.1 Reorientashon integral di nos sistema di formashon kumpliendo ku siglo 21	16
2.2 Un Kultura di Union den Diversidat	18
2.3 Un Kòrsou den Moveshon	19
3. DESAROYO SOSIAL, LABOR I BIENESTAR (SOAW)	20
3.1 Situashon sosial i kalidat di bida	20
3.2 Fortifikashon di Famia	20
3.3 Formashon	20
3.4 Labor	21
3.5 Trabou pa yu di Kòrsou.	21
3.6 Maneho di migrantenan ku tin sierto konosementu i ekspertisio	22
3.7 Supsidio pa här di kas partikular	22
3.8 Edat di penshun	22
4. DESAROYO EKONÓMIKO	23
4.1 Sektornan di atenshon spesial	23
4.2 Turismo	24
4.3 Sektor finansiero internashonal	24
4.4 Sektor logístico (haf marítimo i aeropuerto)	24
4.5 Empresa Mikro i MKB	24
4.6 Kooperativismo	25
4.7 Digital Economy ('Smart nation')	25
4.8 Diplomasia Ekonómiko i Komèrsio Internashonal	25
4.9 Revitalisashon ekonómiko	26

4.10	Sektor di Energia	26
5.	TRÁFIKO, TRANSPORTE I PLANIFIKASHON URBANO (VVRP)	27
5.1	Maneho di tereno	27
5.2	Destinashon di Tereno (EOP)	27
5.3	Bibienda	27
5.4	Transporte Público	28
5.5	Tráfiko Sigur	28
5.6	Bario	28
5.7	Sektor marítimo	29
5.8	Telekomunikashon	29
5.9	Aviashon	29
5.10	Maneho di edifisionan i propiedat di gobièrnu	29
5.11	Maneho di monumento	29
5.12	Lei riba Media	29
5.13	PSB Bank N.V.	29
6.	SALUBRIDAT, MEDIO AMBIENTE, I NATURALESA (GMN)	30
6.1	Salubridat pa tur hende	30
6.2	Naturalessa i Medio Ambiente	31
6.3	Agrikultura, peska, ganaderia i protekshon di bestia	32
6.4	Bienestar di animal	32
7.	HUSTISIA	33
7.1	Prevenshon i resosialisashon	33
7.2	Represshon	34
7.3	Mehorá i fortifiká instansianan den e kadena hudisial	35
8.	MANEHO DI GOBIÈRNU, PLANIFIKASHON I SERVISIO PÚBLICO (BPD)	36
8.1	Servisio na público	36
8.2	Aparato gubernamental en general	36
8.3	Empleado público	36
8.4	Struktura di gobernashon	37
8.5	Centraal Bureau voor de Statisitiek (CBS)	37
9.	FINANSA	38
9.1	General	38
9.2	Presupuesto balansá	38
9.3	Maneho Finansiero (“Financieel Beheer”)	38
9.4	Oumentá entrada	38
9.5	Redusí Gastu	39
9.6	Kámara di Presupuesto (“begrotingskamer”)	39
9.7	Banko Sentral	39
9.8	Impuesto	40
9.9	Sektor finansiero internashonal	40
9.10	Tratadonan fiskal internashonal	40

9.11	Duana	40
9.12	Sektor weganan di plaka	40
9.13	Good Corporate Governance.	41

PRÓLOGO

Kòrsou a ekspresá su deseo pa un gobernashon stabil pa kuater aña ku por krea speransa i pone e pais move bai dilanti den bon direkshon atrobe. Un gobernashon ku ta pone atenshon real riba enseñansa, edukashon i formashon di pueblo i alabes atendé e pobresa i divishon ku ta reina. Un gobernashon kaminda bon gobernashon ku mandatarionan íntegro ta krea konfiansa pa ekonomia por krese p'asina Kòrsou por tin e medionan finansiero nesesario pa tur e kosnan ku ta na e pueblo su kurason i ku ta importante pa un komunitat balansá.

Partido Alternativa Real (PAR), Partido MAN (MAN) i Partido Inovashon Nashonal (PIN) ta kompartí e pensamentu ku nos tur huntu ta pará dilanti un reto i tarea grandi pa trese union, desensia i trankilidat bék den komunitat di Kòrsou. Partidonan ta konvensí ku Kòrsou meresé un gabinete stabil mas rápido posibel, ku ta dirigí riba bon gobernashon, integridat, koperashon, seguridat, formashon, inklushon, òrdú i inovashon pa realisá e potensial di Kòrsou i asina oumentá bienestar di su pueblo.

E partidonan PAR, MAN i PIN den elekshon pa Parlamento tené riba 28 di aprel 2017 na Kòrsou, a haña huntu 12 asiento ku ta forma un mayoria apsoluto den Parlamento di Kòrsou. E 12 asiento ta repartí na e siguiente manera:

- PAR: 6 asiento
- MAN: 5 asiento
- PIN: 1 asiento

E partidonan PAR, MAN i PIN a palabrá ku otro pa forma un Gobièrnu nobo pa Kòrsou pa e periodo 2017 pa 2021 a base di e Akuerdo di Gobernashon aki. Den e akuerdo aki partidonan ta mantené un repartishon di kapítulo segun e aktual nuebe ministerionan di gobièrnu, manteniendo mas tantu posibel e repartishon di fundashon i kompanianan di gobièrnu segun e repartishon akordá den e businessplan di Pais Kòrsou na 2010:

- Asuntunan General (AZ)
- Enseñansa, Siensia, Kultura i Deporte (OWCS)
- Desaroyo Sosial, Labor i Bienestar (SOAW)
- Desaroyo Ekonómiko
- Tráfiko, Transporte i Planifikashon Urbano (VVRP)
- Salubridat, Medio Ambiente, i Naturalesa (GMN)
- Hustisia
- Maneho di Gobièrnu, Planifikashon i Servisio Públiko (BPD)
- Finansa

Pobresa den Kòrsou ta forma un problema serio i eseí ta kondusí na divishon polítiko i sosial entre e poblashon, loke no ta promové konfiansa entre gobièrnu i siudadanonan. Manera den tantu pais na mundu, pobresa i malkontentu ta krea espasio pa populistanan surgi na Kòrsou.

Ta hendenan ku ta sembra ainda mas deskonfiansa i divishon polítiko den komunidat pa nan por alkansá nan metanan. E korupshon i e mal gobernashon asosiá ku esaki ta kondusí na mas pobresa i divishon sosial ainda. Segun CBS (Centraal Bureau voor de Statistiek) un mínimo vital pa un famia di un adulto ku dos yu, ta Ang 1976,00 pa luna. Senso 2011 a konstatá ku di tur ekonomia familiar ("huishoudens"), 25.1% tin un entrada bou di e liña di pobresa (armoedegrens). Mirando e situashon aki ku nos pais ta aden, den tres luna ku e gabinete nobo sintá ta presentá un Programa di Urgensia pa atendé ku e problemanan mas agudo i un Programa di Gobernashon pa 4 año, den kual ta elaborá e prioritatnan segun e Akuerdo di Gobernashon aki den akshonnan konkretu i detayá p'asina duna direkshon di maneho na esnan ku ta goberná i esnan na kabes di e ministerionan. Alabes e programa ta enserá un vehíkulo di kontròl di pueblo pa vigilá si ta kumpli ku loke ta primintí. Den kuadro di esaki partidonan a palabra tambe pa revisá e presupuesto aktual p'asina stipulá den e programa di gobernashon kua ta e prioritatnan mas urgente ku mester pone fondo pe.

Partidonan ke traha ku konfiansa mutuo, determinashon i ku rapides riba un programa di urgencia, formulá segun liña i áreanan den Plan Nashonal di Desaroyo pa Kòrsou, ku ta dirigí riba kombatimentu di pobresa, kondishonnan di bida i deterioro den hopi bario, seguridat den bario, e problema di bibienda, e problemática di penshonadonan, desempleo, kuido i e divishonnan sosial i político eksistente den poblashon di Kòrsou.

Un bon relashon i koperashon entre e paisnan den Reino ta importante pa por probechá óptimamente di tur potensial den Reino na benefisio di nos pueblo.

E partidonan PAR, MAN i PIN a bai di akuerdo tambe ku e siguiente repartishon di kartera i puestonan:

PAR:

- Asuntunan General (AZ), inkluso Refineria di Kòrsou N.V.
- Enseñansa, Siensia, Kultura Deporte (OWCS)
- Tráfiko, Transporte i Planifikashon Urbano (VVRP)
- Hustisia

Alabes Minister- Presidènt, Presidente di Parlamento i Minister Plenipotensiario

MAN:

- Desaroyo Sosial, Labor i Bienestar (SOAW)
- Desaroyo Ekonómiko (MEO), inkluso Curaçao Oil (Curoil) N.V., Integrated Utility Holding N.V. (Aqualectra) i Buskabaai N.V.
- Maneho di Gobièrnu, Planifikashon i Servisio Pùbliko (BPD)
- Finansa

Alabes Vise- Minister Presidènt, Vise- Presidente di Parlamento i Vise- Minister Plenipotensiario

PIN:

- Salubridat, Medio Ambiente i Naturalesa (GMN)

Partido PAR, MAN i PIN ta deklará ku nan a yega na akuerdo pa ehekutá e siguiente akuerdo di gobernashon pa 2017-2021:


Kòrsou, 10 di mei 2017



Partido Alternativa Real (PAR),
Eugene Rhuggenaath



Partido MAN,
Hensley Koelman



Partido Inovashon Nashonal (PIN),
Susanne Camelia-Römer

*Realisando e Máximo Potensial di Kòrsou, akuerdo di gobernashon 2017-2021
vershon final, 10 di mei 2017*

INTRODUKSHON

Kòrsou a pasa den bastante turbulensia despues di elekshon na òktober 2016.

Partidonan ta mira como nan deber pa restablesé konfiansa serka e siudadano pa trese trankilidat bék den komunitat i asina krea e kondishonnan pa desaroyo ekonómiko i sosial. Kòrsou meresé un gobièrnu enérgiko ku den tempu kòrtiku por hiba e pais bék den bon direkshon. Komo tal partidonan ta tuma como punto di salida di e Akuerdo di Gobernashon aki stabilitat, koperashon, bon gobernashon, integridad, seguridat, formashon, dignitat humano i inklushon di tur hende sin distinshon di rasa, religion, koló di kueru, status ekonómiko, nivel di edukashon, miéntras e Plan Nashonal di Desaroyo di Kòrsou (NDP) huntu ku e Programa di Akshon Desaroyo di Hubentut ta forma un base fuerte pa sigui konstruí riba dje, banda di un diálogo kontinuo ku partnernan sosial den e Plataforma Diálogo Nashonal i NGO-nan na Kòrsou.

Partidonan político di Kòrsou, esta PAR, MAN i PIN, ta disidí pa pone atenshon spesial riba e siguiente sinku temanan i akshonnan den e siguiente periodo di gobernashon:

1 Enseñansa, Edukashon i Formashon

Tin un nesesidat grandi pa invertí den desaroyo di e ser humano, for di infansia te edat grandi, pa entre otro kibra e siklo di pobresa i distribushon inadekuá di rikesa. Den e kuadro aki ta imperativo pa traha huntu ku tur institutonan edukashonal, organisashonnan i lidernan den nos komunitat pa prepará e generashon nobo, duna un mihó sosten na e generashon aktual i kuida e generashon di grandinan pa logra un mihó bienestar pa nos tur. Paso kada siudadano mester tin derechi i seguridat pa e por desaroyá i logra e mihó oportunidatnan den bida segun su kapasidat. Realisashon di e potensial di e pueblo aki mester ta para sentral pa por kontribuí na un pais sosio- ekonómiko fuerte i un desaroyo sostenibel pa futuro generashonnan.

Pa por logra e kambionan ku nos pais mester, partidonan ta bai pone spesial atenshon riba un reorientashon fundamental i integral den contenido di enseñansa pa pone énfasis riba e abilidatnan nesesario pa e siglo aki (e asina yamá OECD 21st Century Skills) i un formashon mas amplio i kompleto di nos hóben i adultonan pa asina nan por alkansá nan máximo potensial pa duna un kontribushon na un desaroyo positivo di nos komunitat. Tambe ta bai sòru pa suficiente kuido pre -eskolar pa muchanan entre 0 - 4 año ku ta aksesibel pa tur hende i evaluá e kuido aktual pa alsa e kalidat.

Pa alsa e nivel di kalidat di nos enseñansa i pèrkurá pa duna un edukashon mas kompleto posibel ku alabes por prevení ku hóbennan ta kai for di e sistema di enseñansa, ta nesesario adaptá orario di skol i krea e kondishonnan nesesario pa hasi esaki posibel. Ta krusial pa krea un sistema di enseñansa aksesibel pa tur mucha/hóben i den kual áreanan di teknologia, kultura, arte, patriotismo i deporte ta fungi como instrumentonan pa un edukashon mas kompleto i un desaroyo sano di nos pueblo. Alabes mester inová enseñansa pa e por akoplá

mas mihó riba e nesesidatnan di nos merkado laboral i pa stimulá e aktitut i étika profeshonal nesesario banda di un sentido síviko pa por promové adelanto di Kòrsou.

Krea kondishonnan nesesario, tantu den material, dosente como ampliashon di orario di lès den lei, pa skolnan berdaderamente por duna enseñansa di fishi moderno i di kalidat, mui en partikular enseñansa tékniko. Den e kuadro aki mester buska mas koperashon ku institutonan den region i kompanianan lokal ku ke invertí den enseñansa di fishi.

Esensial den tur e kambionan aki ta e ambiente di skol, lokual ta nifiká ku urgentemente mester mehorá mantenshon di edifisionan di skol i medionan (p.e. teknologia) pa por ofresé un enseñansa di un kalidat haltu ku ta kuadra tambe ku kondishonnan moderno.

2 Famia i Komunidat

Tin un divishon sosial i polítko serio bou di nos pueblo pa algun aña kaba kreá. Pa e motibu aki mester atenshon dirigí pa stimulá union i minimalisá e desigualdat sosial den nos komunidat. Un komunidat den kual un i tur ta disponé di e nesesidatnan básiko i di e oportunidatnan igual.

Pa por logra e kambionan ku nos pais mester, partidonan ta bai pone spesial atenshon riba desaroyo di famia i bario. Bario ta bira e instrumento prinsipal pa desaroyo di komunidat i como tal ta sòru pa e kondishonnan pa realisá un maneho di desaroyo integral i duradero pa bario. Den e kuadro aki ta bai enfoká riba famianan bibando den situashonnan difísil i sosial - ekonómiko malu, barionan den deterioro i marginá ku problemanan serio di kriminalidat i desempleo i ku falta di perspektiva pa hóbennan pa asina logra inklushon di tur hende i grupo den komunidat. Un re-introdukshon di trabou di trahadó sosial den e barionan, mester duna mas yudansa p'asina sostené e famianan den mas nesesidat di un forma dirigí pa nan por sali for di e siklo di pobresa. Ta bon pa hasi uso di programanan di eksterior ku a duna éksito. Tambe ta bai hasi bibienda mas moderno, aksesibel i pagabel i krea suficiente bibienda i/òf oportunidat pa konstrukshon di bibienda propio. Mirando ku transporte públiko ta un nesesidat grandi, ta bai transformá i modernisá esaki.

Pa mayornan ku ta traha por haña mas tempu pa dediká na nan yunan, ta bai traha riba un adaptashon di kondishonnan i sirkunstansianan di trabou.

Pa kombatí kriminalidat, spesialmente den nos barionan, ta pone suficiente medio disponibel pa trese mas órden i seguridat den barionan, manteniendo un aserkamentu di kombatimentu di kriminalidat kaminda tin un balansa entre prevenshon i represhon, pa asina sigurá ku tur hende por biba trankil i sin miedu i gosa di nan libertat. Hustisia sosial restorativo den e kuadro aki mester hunga un ròl importante.

3 Ekonomia i Trabou

Kada ser humano tin derechi riba un bida ku ta brinda satisfakshon di su nesesidatnan básiko manera alimentashon, bibienda, seguridat, aseptashon sosial, rekonosementu i desaroyo propio. E Plan Nashonal di Desaroyo di Kòrsou (NDP) ta krusial pa realisá un desaroyo ekonómiko duradero ku atenshon pa un desaroyo ekonómiko sosial kaminda gobièrnu, sektor komersial/industrial i sindikalismo ta forma partnernan komplementario.

Pa por logra e kambionan ku nos pais mester, partidonan ta bai traha ku seriedat, rèspect i ku determinashon riba un diálogo i koperashon kontinuo entre sektor empresarial, sindikal i gubernamental. Partidonan lo fortifiká e sistemanan di konsulta ku representashon di sindikalismo, koperativanan i sektornan komersial/ empresarial, religioso i sosial. Tambe ta bai mehorá kondishonnan di trabou, krea suficiente protekshon pa trahadó i pone atenshon speshal na sierto gruponan manera penshonadonan, personanan ku limitashon físiko i mental, personanan sin perspektiva riba trabou i hóbennan ku a kai for di e sistema di enseñansa i ta desempleá i hóbennan ku ta kaba enseñansa avansá i superior sin por haña trabou. Alabes lo promové un sistema energético duradero i sostenibel den kua nos mes ta produsí nos energia entre otro hasiendo uso di solo, bientu i laman. Den e quadro aki lo traha inkansablemente pa tene nos refineria habrí na un manera responsabel pa ku nos medio ambiente i salú.

4 Salubridat i Medio ambiente.

Pueblo mester por tin akseso na un sistema di salubridat integral ku ta di un kalidat adekuá i efektivo, kaminda ta pone atenshon riba aspekonan di prevenshon i huntu ku esaki promové un salubridat partisipativo, kaminda médikonan i paramédikonan den kuido primario ta partisipá aktivamente den aktividatnan den nan region pa promové un estilo di bida saludabel. Pa por logra e kambionan ku nos pais mester, partidonan ta bai pone atenshon spesial riba un sistema di salubridat integral ku ta di un kalidat adekuá i efektivo, kaminda ta pone énfasis riba aspekonan di prevenshon di malesa i adikshon. Tambe ta kontinuá ku desaroyo di e kondishonnan nesesario pa fomentá salú i bienestar (e.o. Wellness Tourism, Workplace Wellness i School Wellness). Ta desaroyá maneho pa salubridat na trabou ku introdukshon di programanan empresarial (wellness programs) ku insetivo pa stimulá salú di trahadónan i baha gastunan di seguro médico i oumentá produktividat. Ta bai traha na un redukshon drástiko den tempu di espera pa spesialista i gastu di remedí i pone disponibilidat di fondo pa salubridat como un punto di atenshon sentral den e periodo di gobernashon aki. Importante ta pa fortifiká inspekshon i kèntròl riba servisio di kuido huntu ku un fortifikashon di kèntròl riba kalidat di produktonan di alimentashon den establecimientunan i ampliá e arsenal di medidanan korektivo i sanshonnán. Partidonan ta bai realisá un vishon ku ta enserá un komunitat ekológiicamente balansá ku ta produsí su propio kuminda mas tantu ku ta posibel, ku un ekonomia miksto di industria, servisionan i turismo. Un komunitat teknológiicamente avansá den kua bario i kooperativa ta hunga un papel determinante. Un komunitat kaminda

e maneho di naturalesa i medio ambiente ta dirigí riba konsentisashon di balor i mihó uzo di rekursonan natural pa desaroyo duradero di e hende i pais. Den esaki mester yega na un maneho di awa ku ta basá riba e konsepto di maneho di awa integrá. Alabes ta bai identifiká diferente oportunidatnan den e sektornan agrikultura, krio di bestia i peska i marítimo, eksplorá i implementá esakinan i diseñá programanan pa modernisá e industria dor di mihó uzo di teknologia.

5 Bon gobernashon

Ta nesesario restablesé konfiansa di nos pueblo den política i nos sistema di gobernashon i krea un ambiente di transparensia, integridat i bon gobernashon. Nos tur mester uni forsa pa trese e stabilitat i trankilidat nesesario pa transformá Kòrsou den un pais kaminda ta reina bon gobernashon, konfiansa, progreso, inovashon i adelanto.

Pa por logra e kambionan ku nos pais mester, gobièrnu ta bai pone spesial atenshon riba rèspèt, konfiansa i protekshon ku mester duna na e kuerpo di empleadonan públiko ku mester karga i ehekutá e programa di gobernashon hasiendo uso di digitalisashon. Alabes ta bai fortifiká e órganonan di kontrol i kombatí korupshon, garantísá igualdad di derechi político, ekonómiko i sosial i oportunidad igual pa tur hende sin tene kuenta ku rasa, religion, género i etnisidat.

Un finansa público salú, ku un presupuesto ekilibrá pa mas aña, mester duna e garantía pa por promové un repartishon hustu di bienes i entrada kaminda esnan ku skouder mas hanchu mester aportá mas tantu. Importante den esaki ta pa traha na un stabilisashon di finansa público, generá mas entrada, baha gastu i empoderá órganonan di kontrol.

Un bon koperashon den Reino, kaminda ta yega na un kontenido nobo den e relashonnan den Reino, ta importante pa fortifiká e kooperashon entre e partnernan di Reino, di moda ku konhuntamente por probechá óptimamente e potensialnan na benefisio di habitantenan di Reino.

1 ASUNTUNAN GENERAL (AZ)

E gobièrnu aki ta para pa Bon Gobernashon.

Esaki en general ta nifiká un Gobièrnu kapas, eficiente i íntegro, ku ta goberná na bienestar di su siudadanonan. Gobièrnu ta respétá prinsipionan di bon gobernashon, e.o. di transparensia, igualdat, seguridat hurídiko, motivashon i di konfiansa legítimo.

Gobièrnu ta hiba un maneho estrikto pa balansá su presupuesto, kontrolá su gastunan, minimalisá burokrasia i apliká prosesonan eficiente i transparente di administrashon e.o. di pèmitnan i ta krea kondishonnan (fiskal) atraktivo pa empresan lokal i esnan di afó. Hasiendo esaki, gobièrnu alabes ta evitá tur estorbo di su banda pa ekonomia di pais Kòrsou. Gobièrnu den kuadro di su maneho di Asuntunan General lo traha duru riba edifikasihon di pais ('nation building') segun e rekomendashonnan den e Plan Nashonal di Desaroyo di Kòrsou (NPD).

1.1 Bon Gobernashon

Pa logra tur esakinan den e gobièrnu nobo aki lo mester:

1. Kombatí korupshon i hiba un gobernashon kla i transparente (presentá plan pa implementá rekomendashonnan di e rapòrt di Transparency International (TI));
2. Intensivá kèntròl den nos aparato públiko dor di reforsá i empoderá instansianan di kèntròl.
3. Traha un manera integral pa sòru tur ministerio ta konkordá ku otro.
4. Traspasá pèrmitnan ku aktualmente e Ministerio aki ta enkargá kuné, pa e ministerionan konserniente.
5. Traha lei pa atendé ku problemátika di parlamentarionan ku ta bai ku asiento pa lanta nan propio frakshon despues di un elekshon i/òf durante un periodo di gobernashon.
6. Evaluá si ta nesesario pa inisiá kambionan den nos sistema polítiko teniendo kuenta ku nos eskala chikí i nos demokrasia.

Den kuadro di bon gobernashon lo traha pa yega na un kuadro den kua akshonista/doño ta mantené un kèntròl riba NV-nan di gobièrnu i garantísá ku nan ta funshoná konforme e liña di maneho general ku gobièrnu a stipulá pa loke ta e área ku nan ta kubri. Gobièrnu como akshonista tin kèntròl riba e NV-nan i e maneho. Ta alineá esakinan mas ku e maneho di gobièrnu, respetando sí nan funshonamentu como entidat hurídiko.

1.2 Relashon den Reino

Ta bai traha riba un bon relashon i bon koperashon ku tur e paisnan den Reino, ku énfasis riba rèspect mutuo, rèspect pa nos outonomia, dignidat i igualdat. Pa por alkansá esaki ta entre otro nesesario pa azeptá e Areglo di Disputa manera a keda akordá entre representashon di e 4 parlamentonan di e 4 paisnan den Reino. E relashon entre paisnan den Reino semper por ser ankrá den akuerdonan. Pa loke ta e relashon ku Hulanda lo duna mas kontenido na e funshon di e Minister Plenipotensiario, entre otro pa loke ta atkisishon ekonómiko i kon ta atendé ku asuntunan di yunan di Kòrsou na Hulanda. Ta estrechá i fortifiká e lasonan entre e paisnan den Reino i hasi mas uso di e bentahanan i "economy of scale" ku Reino ta brinda. Ta eksplorá koperashon estrecho riba áreanan manera ekonomia, kombatimentu di retraso sosial, salubridat i siensia. Gobièrnu ta kontinuá ku Konferensia di Reino anual i ta bolbe reintrodusí Weganan di Reino.

1.3 Integridat

Integridat di mandatarionan i parlamentarionan ta di gran importansia, no solamente pa loke ta konfiansa di siudadanonan, pero tambe pa invershonistanan i en general pa bon funshonamentu di nos estado di derechi. Pa halsa nivel di integridat e gobièrnu aki ta tuma e siguiente pasonan:

- Introdusí un lei, ku ta ta suspendé mandatarionan/parlamentarionan outomáticamente si nan haña un sentensia irevokabel pa un krímen, miéntras nan ta den funshon.
- Inisiá un kampaña di informashon pa hasi poblashon di Kòrsou mas konsiente i resistente kontra e peliger di infiltrashon di kriminalnan lokal i internashonal den nos gobernashon, ku ta menasá bienestar di e generashon aktual i futuro.
- Implementá “screening” riba integridat di empleadonan públiko den funshon haltu i esnan na kabes di instansianan importante manera Banco Sentral, Kontrolaria General, etc., fundashonnan i kompanianan di gobièrnu. Pa esaki e lei aktual di “screening” lo sirbi como punto di salida.
 - Lanta un “Unidat kontra Korupshon” (Integriteitskamer), un instansia independiente responsabel pa prevení i investigá korupshon, ku un proveshon pa investigashon riba petishon di tur organisashon i/òf tur persona konserniente

1.4 Struktura estatal

E leinan di konsenso entre tantu a pasa nan periodo di 5 año i e evaluashon konforme lei a tuma lugá. Gobièrnu mester duna "follow up" na e evaluashon pa presentá esaki na Parlamento.

1.5 Komunikashon i informashon

Gobièrnu ta evaluá funshonamentu di su departamento di komunikashon i informashon pa garantisá un mihó komunikashon entre gobièrnu i e siudadano i hinter komunitat.

1.6 VDC

E gobièrnu aki lo laga evaluá funshonamentu di “Veiligheidsdienst Curaçao” (VDC) i ta yega na un forma nobo pa loke ta ehekushon di e tareanan di siguridat nashonal. Si ta nesesario ta adaptá e lei konserní.

1.7 Relashonnan eksterior

Kuminsá analisá e paisnan den kua nos ke pone nos representanten na embahada di Reino. Esaki tantu diplomático como komersial. E parti aki lo sosodé den estrecho koperashon ku e Ministerio di Desaroyo Ekonómiko. Den e kuadro aki mester evaluá tambe e proseso interno di “Directie Buitenlandse Betrekking” (DBB) i Buitenlandse Economische Samenwerking (BES) pa krea suficiente diplomático. Alabes mester pone mas atenshon na implementashon di tratádonan internashonal i evaluá e benefisio di un tratado komersial ku Caricom i ku Merka.

1.8 Refineria

E “lease” ku PDVSA pa loke ta operashon di nos refineria ta vense na final di 2019. Antisipando riba e finalisashon aki un MOU i Head of Agreement a ser firmá ku un kompania estatal di China. Ta antisipá invershonnan kuantioso den e sektor energétiko i ouemento di kapasidat di almasenahe na Bullenbaai. Durante e lunanan benidero gobièrnu ta kontinuá e trabounan ku a ser hasí kaba pa asina realisá e proyekto aki ku éksito entre otro tambe pa desaroyá

terenonan rondó di e refineria. Ta modernisá e refineria i/òf eksplorá e faktibilidat di un refineria nobo p'asina tuma un desishon definitivo.

2. ENSEÑANSA, SIENSSIA, KULTURA I DEPORTE (OWCS)

Desaroyo di nos siudadanonan, partikularmente nos hóbennan, via di instrumento di edukashon i formashon ta fundeshi pa tur desaroyo den un sosiedat. Pa e motibu ei e gobièrnu aki ta di opinion ku mester duna kada siudadano, mas tantu posibel, e posibilidat pa desaroyá su talento - i abilidatnan.

Pa por logra esaki diferente aspekto importante den nos komunitat, manera e ròl, situashon i/òf posishon di famia i bario, nivel i komportashon di nos hóbennan, importansia di norma i balornan den e gobernashon nobo mester haña mas énfasis. Ta p'esei Gobièrnu ta usa e kuater instrumentonan prinsipal den e kartera aki, esta formashon/enseñansa, siensia, kultura i deporte, pa koregí desaroyonan ménos faborabel den nos komunitat, i asina hasi lo máksimo posibel pa realisá e kambionan nesesario den e situashon aktual.

Un komunitat eduká, formá i ku étika (norma i balornan haltu) i empatia pa su kosiudadano ta forma un komunitat ku por bria awor i den futuro. Kòrsou ke ta e pais den Karibe ku riba tereno di formashon ta bai pa ekselensia i ta konta den e tòp 5 i ku ta bai pa 0-drop-out!

Fuera di e oumento rápido di globalisashon, digitalisashon i informatisashon di komunitat mundial, i e dinamismo di prosesonan sosial ku ta kompañá esaki, ta keda un nesesidat pa sigui siña independiente di edat ('life long learning'). Pa kada siudadano por keda funshonal I bon sinkronisá, Kòrsou mester sigui e tendensia mundial akí. E sektor di enseñansa, edukashon I formashon ta esencial pa realisá e vishon pa un Kòrsou moderno (SMART). SMART den e sentido aki ta nifiká ku e futuro di nos edukashon ta bon sinkronisá I koherente riba tur e diferente nivelnan di formashon, salí for di un base komun fuerte I sólido kaminda un I tur por partisipá aktivamente den komunitat.

E aserkamentu aki ta rekerí un reorientashon integral i ta eksigí un evaluashon di nos sistema di edukashon i formashon ku tur partner edukashonal, institutonan eskolar partikular, NGO-nan (i padvinderij), riba tereno di edukashon i otro aktornan relevante inkluyendo e.o. Konseho di Hubentut, Plataforma pa Desaroyo di Hubentut, Plataforma pa Grandinan pa krea posibilidat pa hasi adaptashon pa prepará hóbennan i tambe adultonan mas tantu posibel riba nan futuro.

Pa duna kontenido na e vishon di edukashon i formashon SMART den e área akí tin tres punto di lansa:

1. Un reorientashon integral di nos enseñansa/ formashon i siensia kumpliendo ku siglo 21;
2. Un kultura di union den diversidat;
3. Un Kòrsou den moveshon.

2.1 Reorientashon integral di nos sistema di formashon kumpliendo ku siglo 21

Reorientashon integral di nos enseñansa i formashon ta un proceso dinámiko den desaroyo kontinuo. Den e kuadro aki gobièrnu ta para pa un reorientashon edukashonal total ku ta atendé diferente aspekto simultaniamente. Den e reorientashon aki e 4 idiomanan: papiamentu, hulandes, ingles i spañó, ta esencial. Den e reorientashon aki e komunitat nobo di informashon i konosementu di e siglo aktual (e asina yamá OECD 21st Century Skills) tin implikashonnan importante pa sistemanan di enseñansa, formashon i siensia, teniendo alabes kuenta ku un ekonomia di konosementu dinámiko. Pa por sigui e desaroyonan nobo di e komunitat di konosementu, mester siña nos hóbennan, pero tambe adultonan,

kompetenshanan, abilidatnan i aktitutnan, ku atenshon pa desaroyo di entre otro kreatividat, ekspresshon, empatia i étika (norma i balornan) como parti integral di programanan kurikular (Pre-eskolar, FO, Enseñansa Spesial, VSBO, SBO, AGO, HAVO/VWO, Avansá) i alabes general, sea durante orario eskolar pero tambe pafó di skol.

Mester start ku “e Diálogo Nashonal” usando como punto di salida e ‘Plan Nashonal di Desaroyo di Kòrsou (NDP) i e protokòl “Diálogo Nashonal di enseñansa” ku tur e kuater partnernan ya a firma.

Pa loke ta enseñansa/formashon i siensia, e konsentrasjon prinsipal lo ta riba e siguiente puntonan di akshon:

- Revisá i adaptá e sistema aktual i kuríkulo di nos enseñansa primario i sekundario, inkluyendo e formashon di segundo oportunidad (manera FEFFIK, Sociale Vormings Plicht) ku ta tene suficiente kuenta ku e formashon kognitivo di tur nos hóbennan (The Boy-Problem) pero alabes e formashon di e hende den su totalitat (persoonsvorming) teniendo kuenta nos situashon lokal i desaroyonan internashonal (e.o. instrukshon den enseñansa na ingles, digitalisashon, formanan nobo di komunikashon i instrukshon, materialnan nobo etcetera.);
- Den e reorientashon di e kuríkulo ta traha riba un maneho pa fortifiká e aspekto di spiritualidat na tur instituto eskolar, inkluso pa skolnan públiko. Tambe riba un maneho pa duna mas atenshon na nos propio historia i kultura;
- Evaluá edukashon pre- eskolar i realisá e kambionan den fase;
- Duna debido atenshon na e muchanan di enseñansa spesial evitá krelementu deskontrolá di skolnan di ‘Arbeidsgericht Ondewijs’ (AGO);
- Evaluá i adaptá alabes e eksigensianan nobo pa èksamens di e diferente tiponan di enseñansa, inkluyendo esun di havo/vwo, konforme e eksigensianan intensifiká, pa garantísá konekshon ku un siguiente nivel di enseñansa i tambe pa garantísá kalidat di enseñansa. Den e kuadro akí pèrkurá pa krea kondishonnan pa hasi e prueba di kalkulashon na èksamens final di havo/vwo posibel;
- Introducí sistemanan nobo pa evaluá kalidat di nos enseñansa i formanan di rekapasitashon kontinuo;
- Ta reforsá e guia, inspekshon i kontrol riba diferente área di nos kadena di formashon i edukashon, inkluyendo e Departamento di Inspekshon di Enseñansa, teniendo kuenta ku e.o. e lei di Enseñansa Obligatorio;
- Realisá e konekshon pa sigú estudionan den eksterior, tantu regional como na Europa i kontinuá ku stimulashon di estudionan superior den region. Evaluá e maneho di finansiamentu di estudio i kobraנסה pa trese esaki mas den konkordansia ku e Plan pa Desaroyo Nashonal i tambe evaluá e organisashon ku ta ehekutá ese. Sigui garantísá oportunidad pa nos hóbennan i nos komunitat por sigui estudionan avansá tantu lokal como den eksterior. Buska alabes un fórmula pa regreso di nos profesionalnan hóben i un fórmula pa limitá e debe di estudio i facilidatnan azeptabel di pago bék;
- Krea oportunidad pa nos hóbennan por kore stazje na diferente nivel den gobièrnu, i insentivá empresanan partikular pa nan tambe duna nos hóbennan e oportunidad pa un stazje den nan kompania;
- Huntu ku e sektor di SOAW evaluá e situashon sosial di kada hóben na skol ku mester di atenshon, di manera ku por garantísá nan asistensia i partisipashon na skol.

- Evaluá e posibilidatnan di kambio di orario di nos skolnan i un regulashon adekuá di e asina yamá formashon despues di skol;
- Revisá fasilitatnan di infrastruktura i material i nesesidatnan pa mantenshon di skolnan i re-destiná fasilitatnan eskolar ku no ta den uso;
- Sigui ku e programa di alfabetisashon (funshonal) pa por eradiká e problema di analfabetismo den nos pais;
- Reposishoná e ròl di siensia, pa di un forma sistemátiko optené konosementu den diferente forma, pa sirbi nos komunitat i resolvé issuenan (p.e. solushon di pobresa, konstrukshon di kas trópiko, kambio di klima, energia). Den e kuadro aki finalisá e trabounan pa yega na un maneho di siensia i e lei di enseñansa Superior.
- Redefiní e ròl di Universitat di Kòrsou den formashon di nos studiantenan i e oportunidad pa e ta e centro di formashon di den Karibe. Un aspekto speshal ta evaluá i alsu kalidat di preparashon di dosentenan (LOFO i di dos grado);
- Tambe mester bin un maneho pa investigá, registrá i publiká sifranan statistik di nos enseñansa riba un base regular, pa asina móntor e kalidat di enseñansa atraves di tempu;
- Atendé ku urgencia ku e skarsedat struktural di trahadó di enseñansa na Kòrsou;
- Invertí den kalidat di trahadónan di enseñansa pa medio di entre otro revishon di kondishon i sirkunstansianan di trabou;
- Independisá skolnan público di burokrasia di gobièrnu;
- Studia posibilidat pa krea un Fondo pa Invershon den Enseñansa;
- Revisá normanan pa skolnan supsidiá dor di gobièrnu i analisá kon di un forma SMART por redusí gastu i digitalisá enseñansa mas tantu posibel;
- Instituí un kolegio fiho pa Konseho di Enseñansa i Merkado Laboral (ROA) i reinstitushon di e Centro di Konosementu pa Profeshon i Empresa (Kenniscentrum Beroep&Bedrijf-KBB);
- Atendé ku urgencia e manera ku enseñansa mester kontribuí na desaroyonan riba tereno laboral, en partikular ku bista riba desaroyonan riba tereno energético;
- Ta reforsá e guia, inspekshon i kontrol riba diferente área di nos kadena di formashon i edukashon, inkluyendo e Departamento di Inspekshon di Enseñansa , teniendo kuenta ku e.o. e lei di Enseñansa Obligatorio.
- Transformá Biblioteka Nashonal den un sentro di informashon moderno. Mundu ta globalisá i digitalisá rápidamente, mester studia posibilidatnan pa aktualisá i modernisá e Biblioteka Nashonal di Kòrsou. Mester krea fasilitatnan teknolóxico pa un i tur i tambe tur skol na Kòrsou tin aksesu na Biblioteka Nashonal i Bibliotekanan rònt mundu. Tambe mester promové pa un Bibliobùs moderno i ta mas frekuente den bario. Esaki mester bai huntu ku un promoshon masal i efektivo di lesamentu.
- Den konsulta ku partnernan den media ta introdusí un maneho di media (media beleid) dor di inkorporá tantu media tradisional (korant, televishon i radio), como media online (website i media sosial) i over the top/OTT (medianan manera whatsapp).

2.2 Un Kultura di Union den Diversitat

Kultura ta base pa desaroyo di un komunitat. E ta alabes un instrumento importante pa edifikashon di pais ('nation building'). Den e kuadro aki e afan di gobièrnu ta pa yuda desaroyá siudadanonan i famianan fuerte, responsabel, konsiente, kapas i dispuesto pa kontribuí na desaroyo di nos pais. Gobièrnu ta di opinion ku ta di vital importansia pa fortifiká e balor propio di nos hendenan. Solamente ku konosementu di su historia i kultura, e siudadano por skohe konsientemente pa e kosnan ku ta hasié fuerte, i asina realisá e nashon ku e ke.

Kòrsou konosé un historia kultural tangibel pero tambe intangibel, ku ta hasi di nos kultura i nos komunitat un mosaiko kultural kolorido i diverso, enfokando riba eksistensia di tradishonnan kultural múltiple ku ta hasi nos como pais sumamente riku. Kòrsou tin e posibilidat úniko pa konsolidá “union den diversitat” ku inisio di un proseso pa fortifiká nos metanan komun. Durante e temporada binidero gobièrnu ta bai pone énfasis riba e prosesonan i tradishonnan (normanan i balornan) ku ta mara nos huntu, pa konsolidá nan i fortifiká nos lasonan ku otro.

Den e kuadro aki gobièrnu ta promové i ta duna debido atenshon na nos kultura, como e totalidat di medionan, maneranan i artefaktonan ku nos komunitat ta hasi uzo di dje pa ekspresá su identitat úniko. Konsekuentemente e maneho di gobièrnu ta enserá e.o. lo siguiente:

- Kreashon di un konsensihi histórico i kultural ku ta kontribuí na desaroyo di nos balornan propio i mas rèspect pa nos mes, dor di promové programan, manifestashonnan, charlanan i kursonan kultural i dokumentashon na nivel lokal, interinsular i internashonal.
- Fomentá mas interes pa nos historia, nos herensia kultural i nos ekspresshonn kultural dor di promové dokumentashon di nos historia kultural riba tur nivel.
- Promoshon di mas apresio pa nos propio akto i logronan dor di fomentá mas sentido di responsabilidat, fortifiká nos propio identitat, yega na norma i balornan mas fuerte i alsa e nivel di e sentido síviko.

2.3 Un Kòrsou den Moveshon

Edukashon físiko en general i deporte en partikular ta pilánan importante ku ta kontribuí na formashon i salú físiko, mental i spiritual di hende. Nan tur tin efektonan benefisioso pa nos desaroyo personal, manera: relahamentu, dominio propio, konsentrashon, sentido di éxito, redukshon di obesidat, kompañerismo i koheshon sosial. Alabes deporte ta promové patriotismo i internashonalisashon di e producto Kòrsou, partikularmente ora atletanan di Kòrsou tin ku kompetí den eksterior.

Gobièrnu ta promové partisipashon aktivo i pasivo na moveshon i deporte dor di nos poblashon i spesialmente hubentut i lo stimulá medidanan pa nos hubentut hasi mas ehersisio físiko p'asina kontribuí na un formashon total sano i alabes evitá problemanan ku sobre peso.

Pa logra e metanan deseá riba tereno di moveshon i deporte, gobièrnu su maneho ta dirigí riba entre otro:

- Stimulá moveshon i deporte pre-eskolar mas tempran posibel den e programa;
- Garantisá edukashon físiko i deporte riba tur nivel di enseñansa i krea fasilitatnan c.q. akomodashonnan pa esaki i pone relashon di moveshon ku un bida salú.
- Promové i stimulá moveshon i deporte den bario (e.o. (re)introdukshon di voluntarioboluntarionan i lidernan deportivo den bario).

3. DESAROYO SOSIAL, LABOR I BIENESTAR (SOAW)

Gobièrnu ta konsiderá e sektor di desaroyo sosial, labor i bienestar sumamente importante teniendo kuenta ku e punto di salida di e akuerdo di gobernashon aki ku ta: realisá e potensial di Kòrsou i dignitat humano sentral. Den e kuadro aki e Ministerio di SOAW den su trabounan lo pone énfasis riba e echo ku bienestar di e hende ta sentral i pa logra esaki e trahamentu inter-ministerial ta di sumo importansia. Den e kuadro aki lo tin atenshon tambe pa kombatí pobresa.

3.1 Situashon sosial i kalidat di bida

E situashon sosial i kalidat di bida di un gran kantidat di siudadano ta fuente di preokupashon. Esaki sigur ta konta pa e adultonan mayor, mamanan soltero, hóbennan i personanan ku limitashon. E situashonnan aki ta pidi atenshon a korto plaso.

Den e próksimo periodo di gobernashon lo hiba un maneho pa alsa kalidat di bida pa asina krea un balansa entre e situashon ekonómiko/finansiero i situashon sosial.

Pa traha riba mehorashon di situashon sosial i kalidat di bida di nos pueblo, gobièrnu lo hiba un aserkamentu di ‘bottom-up’ den e sentido ku lo kuminsá analisá e situashon di kada habitante den bario. Gobièrnu aki tin ròl di fasilitadó, dor di entre otro finansiá i pone sosten profesional disponibel pa garantísá esaki.

Lo sigui drecha infrastruktura den bario, esaki tambe den kuadro di drecha kalidat di bida di e siudadano i evitá mas deterioro sosial di bario. Esaki ta yuda den sierito sentido tambe pa hisa siguridat den bario.

3.2 Fortifikashon di Famia

E núkleo di famia ta e base pa edukashon sosial i moral di nos yunan. Gobièrnu lo introdusí programanan na televishon i radio, pa stimulá formashon i mantenshon di famia. Pa fortifiká esaki lo krea kondishonnan adekuá pa un desaroyo familiar sano i balansá.

3.3 Formashon

Nos tin diferente hóben i adulto ku a kai for di e sistema di enseñansa regular pa diferente motibu. Ta solamente a base di formashon direkto por prepará nan pa drenta trabou bèk. Por ehèmpel atraves di e proyekto “1000 hóben na trabou” i tambe formashon direkto pa un fishi atraves di FEFFIK.

Pero tambe ta sostené dunadónan di trabou sea den horeca, den konstrukshon, òf den administrashon na momentu ku nan indiká kua ta e fishinan ku nan tin mester trahadó p'e. Ademas ta stimulá tur invershionista ku ta kuminsá ku proyektonan grandi manera refineria i planta di gas, hotèl nobo, konstrukshon grandi manera ta e kasos ku hospital nobo, pa nan invertí tambe den kursonan i proyektonan spesífiko pa e trahadónan ku nan ta bai tin mester. Pa e proyektonan aki ta duradero mester bini ku inspekshon sosial.

Gobièrnu tin atenshon pa formashon di esnan ku ta kobra ‘onderstand’, den sentido ku ta forma nan i hinka nan den e proseso laboral. Ta duna atenshon tambe na formashon di mayornan kaminda esaki ta nesesario.

3.4 Labor

Pa krea e kondishonnan adekuá di labor i pa garantisá un konekshon eficiente entre demanda i oferta di labor, prioritat lo ta pa bini ku maneho di merkado di labor.

Trabou ta importante pa independensia i dignidat di e “hende”. Un kondishon importante pa un bon kalidat di bida ta garantia riba trabou i entrada. Na mes momentu mester akzeptá sí ku e empresario ta importante pa desaroyo di ekonomia.

Pa krea trabou gobièrnu lo pèrkurá pa e kondishonnan adekuá pa un bon klima di invershon pa invershonianstanan por kumpli ku nan parti.

Tarea di gobièrnu ta pa krea e kondishonnan pa realisá un balanse entre e dos partidonan. Pèrkurá pa hiba kèntròl efektivo i evitá asina ku deterioro di merkado laboral ta influensiá akseso di nos hendenan na trabou.

Kosto di bida ta un fuente grandi di preokupashon pa gran mayoria di nos hendenan. Ta aselerá e proseso pa yega na un penshun general pa tur trahadó.

Mester tin un bon relashon entre gobièrnu, empleado i su representashon sindikal i dunadó di trabou. Niun no por ta eksitoso sin e otro i p'esei un relashon optimal entre e partidonan aki ta eksigencia sin mas pa produktividat i satisfakshon di trabou. E tarea primordial di gobièrnu, den e relashon tripartit aki, ta pa krea e kondishonnan adekuá pa invershonian den ekonomia i ekonomia sosial tuma lugá pa krelementu ekonómiko i oumento di kuponan di trabou ku kondishonnan laboral i suèldunan hustu. Mester revisá leinan laboral pa realisá benefisionan mutuo i duradero pa tantu e trahadó como e dunadó di trabou.

E relashon entre e trahadó i dunadó di trabou tin atenshon kontinuo di gobièrnu. Den e quadro aki, gobièrnu ta sigui sostené e konsepto di diálogo i partisipá den e plataforma di Diálogo Nashonal. Alabes gobièrnu ta bai studia e posibilidat pa legalisá e plataforma aki, kreando kondishonnan nesesario pa e por funshoná optimalmente.

Huntu ku partner sosial den diálogo nashonal gobièrnu ta bai traha riba un pakete di akshon adekuá i balansá ku ta duna protekshon na e trahadó i alabes ta stimulá ekonomia p'asina kita e retraso sosial aktual.

Gobièrnu ta studia posibilidat pa krea den leinan laboral un provishon pa trahadónan na momento ku kompanianan ta bankarota.

Ta intensivá inspekshon di trabou ('arbeidsinspectie') i si ta nesesario ta amplia e kantidat di inspektornan.

Ta aselerá e proseso pa yega na un penshun general pa tur trahadó.

Ademas ta stimulá tur invershonia ku ta kuminsá ku proyektonan grandi manera refineria i planta di gas, hotèl nobo, konstrukshon grandi manera ta e caso ku hospital nobo, pa nan invertí tambe den kursonan i proyektonan spesífiko pa e trahadónan ku nan ta bai tin mester. Pa e proyektonan aki ta duradero mester bini ku inspekshon sosial.

3.5 Trabou pa yu di Kòrsou.

Ta sòru pa e hende lokal bini promé na remarke ora ku tin vakatura/trabou. E filosofia lo ta “kada yu di Kòrsou na trabou promé”. Si ta nesesario ta introdusí e leinan korespondiente. Gobièrnu ta revisá i/òf introdusí lei pa definí kiko ta un stagiaire i pa evitá ku ta kontratá stagiaire pa yena un kupo di trabou strukturalmente.

3.6 Maneho di migrantenan ku tin sierto konosementu i ekspertisio

Tin un lei ku ta regla establecimiento di migrantenan aki na Kòrsou (LAV 2007). Sinembargo mester fortifiká ehekushon di e lei i adaptá esaki di tal forma ku ta fasilitá e establecimiento di direktor-akshonista mayoritario i migrantenan ku konosementu ku por benefisiá nos desaroyo, drenta nos pais.

3.7 Supsidio pa här di kas partikular

Studia posibilidat pa introdusí un supsidio di här pa kasnan di famia ku no ta di FKP, akompañá ku revishon di maneho di supsidio di kas i mihó uzo di e míles di kasnan pará bashí. Den e kuadro aki mester duna prioridat na famianan di un-mayor ku yunan menor di edat.

3.8 Edat di penshun

Refiriendo na resultado di konklushonnan di diálogo nashonal, gobièrnu ta regla edat di penshun den lei laboral pa evitá oumentu di pobresa bou di personanan di 60 pa 65 aña.

3.9 "Loan Sharks"

Tin diferente instansia, pero tambe personanan ku ta brinda fiansa, na prinsipalmente famia i personanan den nesesidat pa nan por yega na entrada, ku un tasa di interes ekstremadamente haltu bou di kondishonnan inaseptabel. Gobièrnu ta bai investigá e desaroyo di e asina yamá "Loan Sharks" pa yega na un maneho pa protehá nos komunitat kontra di abusu finansiero.

4. DESAROYO EKONÓMIKO

Sin krelementu ekonómiko real, no por generá mas entrada pa finansiá e bienestar i nivel di servisio ku e pueblo aki meresé. Ta p'esei, gobièrnu ta duna prioridat pa logra un krelementu ekonómiko duradero i sostenibel i pa tin un partisipashon amplio di tur yu di Kòrsou den nos ekonomia.

Den e kuadro di e filosofia di “Blue Economy” gobièrnu ta eksplorá e posibilidatnan pa utilisá nos rekursenan natural ku Kòrsou tin na abundansia na un manera responsabel pa generá aktivitat ekonómiko i kreashon di empleo. Gobièrnu ta bai instituí un plataforma interministerial “Blue Economy” pa enkargá ku e tarea aki.

Krelementu ekonómiko i trabou ta ser realisá dor di empresarionan, ku sosten di gobièrnu ku lo mester tin e ròl di fasilitadó kreando e kondishonnan adekuá, manera:

- A. Eliminá “Redtape” (eliminá pèmitnan innesesario i digitalisá esnan ku ta nesesario): vestigingsvergunning en directievergunning liggen klaar, voor de overage vergunningen is een plan van aanpak beschikbaar.
- B. Baha kosto di hasi negoshi
- C. “Manpower planning” I “bouwstroomplanning”
- D. Partisipashon aktivo i kolaborashon ku partnernan sosial den plataforma Diálogo Nashonal.
- E. Krea un “Aliado Pa Progeso” (Coalition Of The Willing) kaminda Gobièrnu, sektor empresarial y NGO's ta bira ‘deelverzameling’ di otro i no ta para kada unu riba nan kurpa. Sektor sindikal ta forma parti di NGO.
- F. Introducí un Taskforce interministerial pa kanalisá proyektonan grandi.

4.1 Sektoran di atenshon spesial

Ta stimulá krelementu ekonómiko en general, pero gobièrnu lo identifiká algun área ku lo haña atenshon spesial.

Ta trata di áreanan/proyektonan konkreto ku tin e potensial pa krea kupo di trabou rápido i ku ta trese divisa i invershon estranhero fresku den nos ekonomia.

Esakinan ta:

- A. Refineria Petrolero i su áreanan di sosten
- B. Infrastruktura Turístiko i Horeca
- C. Sektor Finansiero Internashonal
- D. Sektor logístico (Haf marítimo i Aeropuerto)
- E. Empresa mikro i MKB
- F. Kooperativismo
- G. “Digital Economy” (“Smart Nation”)
- H. Diplomasia Ekonómiko Internashonal
- I. Revitalisashon Ekonómiko
- J. Institushon di un “Centraal Planbureau”
- K. Kòrsou como sentro di prueba (lab. center) pa energia duradero

4.2 Turismo

E Plan Maestro “Tourism Masterplan 2015 - 2020” lo siguí como e guia den turismo.

Gobièrnu ta desaroyá banda di esaki un plan integral pa Bândabou, Ostpùnt, Kosta sur i ta stimulá empresanan mikro i mediano pa partisipá den e desaroyo, ta enfoká riba entre otro “eco-tourism” i tambe “wellness tourism.”

Ta importante pa gobièrnu apliká e “smart technology” i hasi uso di Big Data pa kolekshoná data relevante pa promoshon turístiko (‘Internet of Things’).

Adishonalmente gobièrnu lo inventarisá e terenonan otorgá ku metanan turístico ku no a wòrdú desaroyá. Konhuntamente ku otro Ministerionan relevante mester krea trayektonan di formashon i entrenamentu pa hendenan ku ta òf ke laborá den turismo.

Gobièrnu ta bai evaluá e kondishonnan aktual a base di kua ta duna “tax holiday” na proyektonan hotelero i ta bin ku kambionan si ta nesesario. Ta reorganisá CTB pa e bira un Organisashon di Turismo Nashonal (NTO), den kua sektor privá tambe ta representá. Alabes ta sòru pa un debido implementashon di e Strategic Tourism Masterplan. NTO ta bai ta responsabel pa turismo krusero miéntras ku CPA ta keda solamente enkargá ku kustodia di e pirnan.

4.3 Sektor finansiero internashonal

Nos sektor finansiero internashonal ta un fuente di entrada i empleo ku ainda tin su importansia. E sektor aki ta sòru tambe pa divisa.

Ku bista riba 2019 gobièrnu lo bai tin kontakto intensivo ku e grupo aki pa komprondé nan nesesidatnan i kaminda ta posibel tradusí esaki den sosten na e sektor i desaroyo di produktonan nobo den kuadro e “new midshore reality”.

Sostené desaroyo i inisiativonan alternativo riba tereno di servisionan internashonal, manera commodity trading.

4.4 Sektor logístico (haf marítimo i aeropuerto)

Gobièrnu lo siguí hasi invershonnán nesesario entre otro pa realisá e di dos Megapir, desaroyo rondó di Waaigat/Schottegat, “upgrading” i ekspansion di nos aeropuerto, sigui komersialisá e terenonan rondó di nos aeropuerto i hafnan i fortalesé posishon stratégiko di nos zonanan ekónomiko.

Gobièrnu ta studia posibilidatnan pa amplia rutanan di transporte aéreo i marítimo den Karibe pa eksportashon.

Ta kontinuá ku implementashon di e akuerdo entre Gobièrnu i InselAir ku a firma na yanüari 2017 ku meta pa stabilisá InselAir i asina garantisá konekshon aéreo aktual entre Aruba, Boneiru i Kòrsou.

Ta kontinuá ku ehekushon di e akuerdo ku partnernan den Reino tokante e grupo di eksperto ku lo studia i analisá konekshon aéreo viabel i duradero entre Kòrsou, Aruba, Boneiru i Isla Riba.

4.5 Empresa Mikro i MKB

Nos empresarionan lokal mikro i MKB lo por konta ku mas sosten di Gobièrnu como ku nan ta forma e wesu di lomba di nos ekonomia. Lo traha den estrecho koperashon ku entre otro Adekk pa duna contenido na esaki.

Komo parti di e strategia pa stimulá e ekonomia inklusivo, gobièrnu lo bini ku programanan i kursonan pa krea mas empresario mikro i MKB. Den e kuadro aki gobièrnu lo studia e

posibilidat pa introdusí “microlending”. Esaki pa sea industria chikí, compra i benta, peska, agrikultura i krio di bestia òf horeca.

E maneho ekonómiko tokante peska, agrikultura i krio di bestia ta haña atenshon spesial den e sentido ku e gobièrnu aki ta intensivá su kontakto ku esnan enbolbí i saka afó den ki forma mas por sostené nan. Esaki ta tuma lugá den estrecho koperashon ku Ministerio GMN.

Ta bai animá esnan enbolbí pa nan organisá nan mes, sea den koperativa òf di otro forma pa asina gobièrnu por sentralisá su ayudo. E punto di salida ta ku nos produkshon lokal mester por bai abastesé i finalmente supstansia un parti supstansial di nos merkado.

Gobièrnu ta sigui ku e proceso pa integrá Korpodeko i Curaçao Development Institute (CDI), posiblemente ku OBNA i traspasá e fondonan di Stichting Economische Ontwikkeling, den un organisashon pa yega na optimalisashon di nan funshonamentu i mihó sosten pa e desaroyo di Kòrsou.

4.6 Kooperativismo

Kòrsou tin un historia riku riba tereno di kooperativismo, manera kooperativanan di spar i krédito (“credit unions”) i tambe kooperativanan sektoral manera den sektor agrario.

Pa promové desaroyo sosial-ekonómiko duradero, desaroyo sektoral (p.e. agrikultura, peska, sektor kreativo), desaroyo sosial empresarial (“corporate social responsibility”) i kolaborashon empresarial pa mehorá akseso na konosementu, teknologia i finansimentu, gobièrnu lo promové i yuda fortalesé koperativanan. Esaki partikularmente esnan dirigí riba aktividadnan ekonómiko. Pa logra esaki gobièrnu ta traha huntu ku FEKOSCAN pa amplia konsientisashon i konosementu riba temanan di kooperativismo, pero tambe studia posibilidat pa krea kondishonnan faborabel (p.e. fiskal) ku ta hasi posibel pa koperativanan floresé na Kòrsou.

4.7 Digital Economy ('Smart nation')

Implementá e Master Plan: “E-Commerce Road Map 2016-2018”, huntu ku “stakeholders” relevante pa krea kondishonnan nesesario pa alsa posibilidat pa empresenan di Kòrsou (chikí i mediano), por partisipá den ekonomia digital, p'asina por brinda servisio i produktonan na konsumidónan rònt mundu. Konektividat (transporte, komunikashon, transakshonnan finansiero) i akseso na ekonomia digital (“e-commerce”) ta e mihó manera pa ekspandé merkado pa nos empresarionan lokal i pa stimulá inovashon, kompetitividat i kresegmentu di negoshi pa medio di eksportashon.

Lo hasi esfuerzo pa tambe establecé un ekonomia digital lokal, promoviendo entre otro transakshonnan digital (pago), merkadonan “online” pa empresenan lokal (“e-market place”) i interkambio ku servisionan di gobièrnu via bentana digital.

4.8 Diplomasia Ekonómiko i Komèrsio Internashonal

Gobièrnu lo fortalesé relashonnan komersial ku paisnan den Latino Amérika i Karibe, pa medio di diplomacia ekonómiko pa amplia posibilidatnan di kolaborashon entre gobièrnunan, organisashonnan sektoral, institutonan di edukashon i empresenan individual pa asina promové ‘entrepreneurship’, inovashon, eksportashon i generashon di divisa.

Lo enfoká entre otro riba lasonan ku Colombia, Cuba, Repùblika Dominikana i Sürnam i fortifiká lasonan komersial ku Hulanda i Oropa. Den esaki lo hasi uzo optimal di e relashonnan

históriko, kultural, komersial eksistente, relashonnan familiar (diáspora) i embahadanán di Reino den region.

Gobièrnu ta atendé ku Kòrsou su posishon den Organisashon Mundial di Komersio (WTO) i stimulá uso di e areglo ku Union Europeo i ku Norte Amérika p'asina nos empresarionan tin mas merkado pa kua nan por eksportá produkto i servisio.

4.9 Revitalisashon ekonómiko

Gobièrnu lo desaroyá i promové aktivitat ekonómiko i invershon den nos sentro di siudat a base di un vishon di *Willemstad den siglo 21* ("SMART City"); un siudat riba lista di patrimonio di humanidat (UNESCO) pero ku un kontenido moderno, futurístiko, inkluyendo un ekosistema empresarial vibrante, aksesu na teknología i konektividat ICT 'state of the art', hospitalidat i bibienda moderno pa tantu turista i nos hendenan lokal (hóbennan en partikular), i un centro di edukashon, kultura i rekreo ku henter poblashon tin aksesu na dje.

E desaroyo aki lo sirbi como modelo pa mehorá kalidat di bida den tur nos barionan.

4.10 Sektor di Energia

Adoptá i formalisá e maneho energétiko i implementá e rekomentashonnan ku énfasis riba sostenibilidat, posibilidat di uso di liquid natural gas (LNG) na momento ku esaki bira disponibel i "waste-to-energy".

5. TRÁFIKO, TRANSPORTE I PLANIFIKASHON URBANO (VVRP)

Gobièrnu lo kontinuá ku trabounan di infrastruktura na entre otro Punda/Otrobanda, Marie Pampun, Sta. Rosa wèg, etc.

Tambe e maneho pa loke ta okupashon ilegal di tereno i awa lo kontinuá.

5.1 Maneho di tereno

Lo kaba ku e lista largu di espera pa por bin na remarke pa un tereno pa traha kas. Esaki lo duna un empuhe grandi na solushon di skarsedad di bibienda pasobra ta konosí ku si un yu di Kòrsou por disponé di un pida tera e ta traha su kas segun su forsa.

Pa loke ta e terenonan di här pa traha kas, kaminda esaki ta posibel, lo kambia esakinan den tereno di "erfpacht" pa hendenan por haña hipotek, pa mantené i drecha nan kas.

Mester definí kua terenonan ta apropiá p'asina apartá pa agrikultura i duna esnan ku kier planta òf tene krio di bestia oportunidat pa bin na remarke pa esaki dentro di un tempu rápido. Esaki basá riba un maneho di nesesidat di Kòrsou.

Tambe ta introducí un prohibishon general pa otorgá tereno na kosta, ku ta surpasá e liña di 25 meter "awa haltu" for di kosta. Lo garantísá pasashi liber pa playanan pa pueblo di Kòrsou. Pa sigui e maneho aktual pa kombatí tereno i awa ilegal lo sigui aktua kontra ilegalidat pa asina sòru ku kumplimentu ku lei i reglanan eksistente.

5.2 Destinashon di Tereno (EOP)

Evaluá i revisá EOP. Esaki ta nifiká ku ta mantené e prinsipio di zonifikashon, pero ta dediká un parti mas amplio na desaroyo urbano, esta bibienda i komersio.

5.3 Bibienda

Tin mîles di kas ilegal, miéntras na mes momentu mîles di hende tin añanan largu riba un lista di espera pa warda un kas di FKP òf warda tereno "makro ppp", mikro ppp", "zelfbouw".

Gobièrnu lo inventarisá tur proyekto di FKP ku no ta kana i lo remedíá esaki. Lo traha un plan ku akshonnan konkretu pa eliminá e retraso di konstrukshon di kas i atendé e lista di espera na FKP.

Lo pone tereno na disposishon di FKP, pa por aselerá konstrukshon di kas, pa yuda eliminá e lista di espera mas lihé posibel. Tambe trese un kambio den e ordenansa di sistema di lista di espera di FKP.

Lo instruí FKP pa traha algun modelo alternativo di konstrukshon duradero, ekónomiko, pa di tal forma otronan por kopía esakinan. Den e modelonan lo pone énfasis riba spar energia, spar material, spar awa, un medioambiente sano paden i pafó, ku ta trese tiki molèster pa ku lus, sonido, etc., ku no kondusí na polushon, ku uso di material re-usabel.

Gobièrnu lo desaroyá un sistema di sertifikasiashon pa e tipo di kasnan aki. Universidat di Kòrsou por yuda investigá kua sistemanan pa konstrukshon ta duradero na Kòrsou.

Ta pone mas atenshon na mantenshon di e kasnan di FKP.

Ta sòru pa fortifikasiashon supstancial di e kantidat di trahadó na ministerio di VVRP, pa nan, despues di un bon entrenamentu, por atendé e problemanan aki. Mayoria di biaha regulashon i legislashon den e áreanan akí ta na òrdú, pero aki tambe tin falta di aktuashon.

Gobièrnu lo optimalisá su servisionan dor di atendé ku kehonan mas eficiente i efikas. Pa esaki ministerio di VVRP tin ku hasi e kambionan nesesario den su organisashon. Ademas pueblo

mester haña oportunidat pa hasi su keho na un manera mas fásil i eficiente por ehèmpel via telefòn, e-mail i wèpsait.

5.4 Transporte Pùblico

Mester reformá e sistema di transporte pùblico na Kòrsou pa subi e grado di mobilidat. Pa esaki mester hasi un estudio i bini ku proposishonnan konkretu pa determiná kua ta e mihó manera pa yega na un restrukturashon di transporte pùblico na Kòrsou.

ABC-busbedrijf huntu ku bùsnan chikí, mester forma un ret ku ta hasi Kòrsou aksesibel pa tur bario i for di tur bario. Konsekuentemente mester amplia e aksesibilidat di ABC na mas bario i adaptá su supsidio pa e por amplia e servisio.

Gobièrnu lo sigui animá ABC-bedrijf pa nan sigui ku nan maneho di sirbi tur bario di Kòrsou. Gobièrnu lo sostén e shofùrnán di bus chikí ku ke forma un koperativa pa asina baha nan gastu di kompra di bus.

Tambe gobièrnu lo buska eksperto pa revisá i adaptá i modernisá e lei di transporte pùblico.

5.5 Tráfiko Sigur

Pa basta aña kaba siguridat di tráfiko ta bou di preshon. E kantidat grandi di aksidente tur dia i e kantidat pa kabes relativamente haltu di víktima mortal ta mustra un tráfiko insigur. Pa trese kambio lo sigui e práktikan internashonal pa asina pa medio di 3E (Education, Engineering, Enforcement), esta edukashon, kambio di infrastruktura i control logra un grado haltu di seguridat den tráfiko.

Último añanan a hasi hopi esfuerzo pa eliminá e retraso di mehorashon di infrastruktura (e.o. drèmpel) i na diferente krusada peligroso a traha plenchi di tráfiko (rotònde).

Gobièrnu ta di opinion ku mester kontinuá ku e maneho akí di mehorashon di infrastruktura. Huntu ku eseí mester hasi kontròl regular, efektivo i riguroso pa prevení komportashon irresponsabel i insigur den tráfiko. Pa esaki ta pone énfasis riba formashon di e usuario

Pa basta aña kaba siguridat di tráfiko ta bou di preshon. E kantidat grandi di aksidente tur dia i e kantidat pa kabes relativamente haltu di víktima mortal ta mustra un tráfiko insigur. Esei ta primeramente debí na mal komportashon den tráfiko.

Último añanan a tuma lugá un esfuerzo pa rekuperá e retraso di mehorashon di infrastruktura (e.o. drèmpel) i na diferente krusada peligroso a traha plenchi di tráfiko (rotònde).

Gobièrnu ta di opinion ku mester kontinuá ku e maneho deliñá akí di mehorashon di infrastruktura. Huntu ku eseí mester hasi kontròl regular, efektivo i riguroso pa prevení komportashon irresponsabel i insigur den tráfiko.

Mester introdusí e “waarborgfonds” ku ta garantísá ku esnan ku ta kore sin seguro no perhudiká otronan.

5.6 Bario

Renobashon di bario ta nifiká ku e infrastruktura di bario, esta kaminda, asera, plenchi, mester haña hopi atenshon. Kamindanan mester tin asfalt, asera i lugá pa kore baiskel.

Barionan mester di sitionan di enkuento sosial manera plenchi, parke di rekreo i lugá pa hasi deporte. Kanchanan deportivo multifunshonal den bario (kaminda esaki ta posibel i deseabel) ta keda konektá riba e ret pùblico di iluminashon i ta pone fondo disponibel pa esaki.

Ta revisá nos leinan i kuminsá atendé e kantidat di kasnan i monumentonan bashí i bandoná den bario. Si mester ta adaptá e lei di ekspropiashon di tal forma ku por ekspropiá e kasnan aki mas lihé.

E proyekto di duna kada kas un adrès i number korekto ta sigui.

Ta sigui ku mantenshon di kaminda i mantenshon di roinan ku mas tantu vegetashon posibel den kanalnan.

Tambe ta sigui ku mantenshon di infrastruktura como parti di maneho duradero pa alsa kalidat di bida.

5.7 Sektor marítimo

Gobièrnu ta hiba un maneho pa mas tantu kompanianan di barku registrá nan barkunan na Kòrsou i asina nabegá bou di bandera di Kòrsou. Ta hasi e adaptashonnan nesesario den nos leinan di nabegashon pa hasi nos pais atraktivo pa esaki.

Halsa kalidat di servisio di e outoridat marítimo.

5.8 Telekomunikashon

Mester modernisá e leinan aktual di telekomunikashon pa stimulá desaroyo di telekomunikashon pa Kòrsou i konsekuentemente na bentaha di siudadanonan.

Tambe mester krea kondishonnan pa tin kondishonnan hustu ('level playing field') pa tur kompania di telekomunikashon ku ta operá riba merkado lokal. Ademas mester determiná kua ta e mihog forma pa atendé ku kompetensia inhustu di kompanianan ku ta operá físicamente den eksterior ("over the top providers").

5.9 Aviashon

Gobièrnu lo tuma e pasonan nesesario pa aselerá e proseso pa nos pais ta bèk na kategoria 1, inkluyendo reservashon di e medionan finansiero nesesario. Ademas mester modernisá e leinan vigente.

5.10 Maneho di edifisionan i propiedat di gobièrnu

Mester inventarisá propiedat i edifisionan di gobièrnu i stipulá un maneho di uso, mantenshon, restorashon i benta di edifisionan ku ta para bashí i evitá deterioro.

5.11 Maneho di monumento

Mester revisá e maneho di monumento i en koperashon ku otro ministerio sigurá ku nos ta keda riba lista di patrimonio mundial.

5.12 Lei riba Media

Den konsulta i diálogo ku partnernan den media ta revisá i amplia e leinan aktual (mas ku solamente e aspekto tékniko) di televishon i radio i introdusí lei pa media di korant, online (website i media sosial) i "over the top/OTT" (apps manera whatsapp). Alabes ta independisá regulashon di media, regulá i fortalecé e kòntròlnan di media (tradisional, online i OTT) pa medio di BTP como reguladó independiente i ta lanta un "media-kamer" ku ta konsistí di representante di media, gobièrnu i un miembro independiente pa asina atendé ku kehonan di difamashon, kalumnia i insulto di personanan den medionan di komunikashon.

5.13 PSB Bank N.V.

Gobièrnu ta tuma desishon riba e ròl ku PSB Bank N.V. mester bai tin den futuro i delineá un programa di transishon den kua lo determiná tur paso nesesario pa sigurá funshonamentu optimal di e instituto.

6. SALUBRIDAT, MEDIO AMBIENTE, I NATURALESA (GMN)

6.1 Salubridat pa tur hende

Salubridat lo tin enfoke riba prevenshion. Primeramente lo tin un aserkamentu aktivo, kaminda e konsepto amplio di bienestar - “wellness”- ta dirigí riba kalidat di e bida humano dor di optimalisá e salú físiko i –mental como prioridat i no ta síntomanan i enfermedatnan, ku lóglicamente lo sigui haña atenshon. Lo entamá e siguiente pasonan den e kuadro aki.

General:

- Aparte di di e funshonnan di den liderazgo tin algun funshon kritiko den diferente área ku mester keda yená ku hendenan kalifiká i fortifiká tur área di inspekshon i kòntròl den kuadro di salubridat, medio ambiente i naturalesa.
- Modernisá leinan riba tereno di salubridat pùblico, medio ambiente i naturalesa, peska, ganaderia i agrikultura i implementá e lei Beroepen in de Individuele Gezondheidszorg i leinan riba medisina alternativo i integrativo .
- Sigui implementá e evaluashon di funshonamentu di di servisio di ambulans i kondusí un revishon di funshonamentu di tur persona hurídiko ku ta kai bou di e kartera, i, kaminda ta nesesario, entamá prosesonan di kambio i fortifikashon di bon maneho (good corporate governance).

Prevenshon

- Introdukshon di Salú Mobil, kaminda den barionan rònt Kòrsou, ta promové “wellness coaches” i profesionalnan di moveshon, ku ta duna oportunitat ku regularidat na habitantenan pa kontrolá nan salú, haña informashon i konsulta tokante alimentashon apropiá, biba salú, moveshon físiko, higiene i kuido dental segun un plan individual, etc.
- Diseñá i ehekutá un programa pa formashon riba bienestar, posiblemente huntu ku otro institutonan médko, di kuido i di enfermeria lokal.
- Introdukshon i implementashon di un kampaña mediátiko pa ku prevenshon di riesgonan pa salú i bienestar mental. Tambe sigui desaroyá maneho pa baha e nivel di embaraso hubenil dor di duna mas informashon i medionan antikonceptivo den Salú Mobil i ampliashon i mehorashon di kalidat di prevenshon i kuido den tur área di adikshon.
- Investigashon científiko di nos yerba- i matanan den kuadro di medisina alternativo i promoshon di konosementu di resultadonan di e investigashonnan.
- Investigashon, promoshon di aksesibilidat di alimentashon salú pagabel i investigashon riba medidanan pa deskurashá importashon i consumo di alimentoan dañino pa salú.
- Fortifiká kòntròl i implementashon tékniko i táktiko pa prevenshon di malesa i promoshon di higiene den barionan.
- Studia e posibilidat pa desaroyá i implementá un Fondo di Salú pa invershion den proyektonan preventivo.

Sanashon

- Ta sigui traha Hospital Nobo. E megaproyekto aki no ta enserá solamente e konstrukshon, pero tambe mantené e aktual SEHOS funshonando, e transision di hospital bieu pa hôspital nobo, kaminda mester dediká atenshon na rekapasitashon di e personal. Lo garantísá un bon maneho di e proyekto dor di implementashon di e rekomentashonnan for di e diferente rapòrtnan riba Evaluashon di HN;

- Huntu ku tur aktor relevante, inventarisá e problemanan ku ta kondusí na lista di espera pa tratamentu médko i tuma pasonan relámpago pa aliviá retraso. Den e kuadro aki lo revisá e maneho pa ku spesialistanan i dòkternan di kas i tuma desishon riba e norma pa kantidat di pashènt pa dòkternan di kas i spesialista. Si ta nesesario lo adaptá lei di moratorio.
- Investigá nesesidatnan di hóben (i nan mayornan) i adultonan ku un limitashon mental (verstandelijk gehandicapten) i esnan ku un desabilitashon físiko pa yega na un pakete di sosten.
- Instituí un sistema di keho transparente i efektivo pa tur pashènt i personanan den kasnan di kido médko.
- Amplia aksesibilidat di kido den mas área riba Kòrsou.

Trayektonan integrativo riba tereno di salubridat

- Kontinuá desaroyo di e kondishonnan nesesario pa fomentá Salú i Bienestar (e.o. Wellness Tourism, Workplace Wellness i School Wellness) i desaroyá maneho pa salubridat na trabou ku ta dirigí riba alsa produktividat i baha gastu médko.
- Huntu ku Ministerio di Hustisia ta evaluá funshonamentu di Brasami i di Fundashon Maneho di Adikshon i tuma e pasonan nesesario pa alsa efektividat di e institutonan.

6.2 Naturalesa i Medio Ambiente

E maneho di naturalesa i medio ambiente ta dirigí riba konsientisashon di balor i mihó uzo di rekursonan natural pa desaroyo di e hende i pais. Nos mester prevení mas tantu posibel e polushon kontinuo di nos airu, awa i tera i redusí e polushon eksistente. Lo entamá e siguiente trayektonan:

- Kòrsou ta parti di e biodiversitat global ku nos laman, flora i founa úniko. Parti di eseí ta e.o. krelementu di Pal'i Mangel na vários sitio ku ta ser menasá i nos refnan di koral. Ámbos ta hunga un ròl importante den desaroyo duradero i ta determinante pa protekshon di nos kostanan i founa marítimo. P'eseí lo intensivá e maneho di protekshon di biodiversitat i oumentá kòntròl riba tur loke por kousa daño na esakinan.
- Mantené i hasi uso di oséano, lamannan i rekursonan marino di un forma sostenibel.
- Konservá, drecha i promové uso sostenibel di ekosistemanan, manehá mondinan di un forma sostenibel, kombatí desertashon i degradashon di tera i drai bék i para pèrdida di biodiversitat inmediatamente
- Kontinuá ku desaroyo i implementashon di un maneho pa awa dushi (áwaseru) kaminda lo plania i implementá konstrukshon i mantenshon struktural di damnan pa fin di uzo di awa dushi pa kultivo di piská i otro géneronan di bestia i sistemanan di agrikultura.
Selikor: Entamá un trayekto di separashon di shushi i resiklahe agresivo kompañá ku krementu di proyektonan den kuadro di Ekonomia Blou (resirkulashon di desperdisio) i investigá proyektonan konkreto, elaborá i implementá esakinan pa prosesamentu rendabel di shushi den energia duradero (waste-to-energy).
- E refineria mester ta limpi i mester kumpli duradero ku normanan internashonal di medio ambiente. Ta kontinuá ku implementashon di e kondishonnan stipulá pa ku refineria den kuadro di polushon. Den e kuadro aki ta formalisá e akuerdo di koperashon ku GGD Amsterdam.
- Studia e posibilidatnan pa introdusí insentivonan pa empresanan ku kombertí nan produkshon tradisional den unu sostenibel, hasiendo uzo di medionan no-dañino pa

medio ambiente.

- Studia i implementá e posibilidatnan pa desanimá uzo di empakenan dañino pa medio ambiente, manera saku, kùp i baki di kuminda di foam i plèstik, etc.
- Desaroyá un manejo integral di plantashon pùbliko (groenvoorziening en -beheer) i krea sinergia di eseis ku manejo di awa dushi, konhuntamente ku Ministerio di TTUP (VVRP).
- Implementashon di plan di mantenshon di playanan.

6.3 Agrikultura, peska, ganaderia i protekshon di bestia

Eliminá hamber, realisá seguridat alimentisio i mehora alimentashon i promové agrikultura sostenibel. A yega tempu pa identifiká e diferente oportunidatnan den e sektornan aki, eksplorá i implementá esakinan. Den e kuadro aki lo entamá e siguiente trayektonan:

- Huntu ku ekspertonan lokal i internashonal, identifiká nesesidatnan pa piskadó-, ganadero- i kunukeronan aktual i desaroyá un plan di mas aña pa modernisashon di desaroyo di e industria di ganaderia, agrikultura i peska na Kòrsou i promové i krea insertivo pa proyektonan mikro di kultivo di piská, bestianan di laman i produktonan nutritivo.
- Gobièrnu ta apuntá un òf mas área di tereno ku ta ser parselá i destiná pa agrikultura i/òf kriò di bestia pa konsumo.
- Huntu ku Ministerio di OWCS prepará i lansa un kuríkulo di estudio práktiko di agrikultura, peska i ganaderia i fasilitá partisipantenan ku desaroyo i implementashon di empresenan chikí riba e tereno aki.
- Promové i reforsá kooperativismo pa mehorá posishon riba merkado di produktonan di agrikultura, peska i ganaderia. Tambe lo studia e posibilidat di proyektonan PPP den e kuadro aki. Re-instituí den un bachi nobo i moderno un servisio ehekutivo pa fasilitá agrikultura, peska i ganaderia i instituí banko(nan) di simia.
- Entamá un kampaña di mas aña pa promové agrikultura kasero (home farming) i oumentá aktividatnan di sektor privá riba tereno di formashon (p.e. kursonan di plantamentu di bërdura na kas, koperativa di plantadónan di berdura di kas pa interkambio di konosementu i produkto, etc.).

6.4 Bienestar di animal

Promoshon di bienestar di animal, e.o. pa medio di lei, supsidio pa asilo di bestia i kampañanan informativo. Lo traha huntu ku Kuerpo Polisial i Ministerio Pùbliko pa kombatí maltrato di bestia. Huntu ku instansia i ekspertonan lokal, re-definí i yega na un parke di bestia moderno ku ta kumpli ku normanan internashonal, ku atenshon speshal pa edukashon di muchanan riba kuido i amor di bestia i e balor di esaki, banda di e funshonnan rekreativo i turístiko di un parke asina.

7. HUSTISIA

Ministerio di Hustisia ta sòru pa seguridat, órden i trankilidat den komunidat di Kòrsou tantu di e siudadanonan como di tur persona ku ta temporalmente na Kòrsou. Tur hende mester por biba den nos komunidat den libertat. Den e periodo di gobernashon nobo aki e kadena hudisial ta bai hasi tur esfuerzo pa traha na un komunidat mas hustu i mas sigur i tur kaminda ku ta nesesario duna asistensia.

Aktualmente e preokupashon mas grandi i mas urgente den pueblo di Kòrsou ta e ola di kriminalidat. Hendenan tin miedu di entre otro ladronisia i atrako i ta sinti nan mes insigur asta den nan mes kas.

Un otro preokupashon resien ta e vulnerabilitat di organisashonnan den nos komunidat pa ku “cybercrime”. Nos ta den un situashon ku siguridat den nos komunidat no ta na e nivel deseabel.

E siudadano diariamente ta keda konfrontá direktamente òf indirektamente ku krímen òf konsekuensianan di krímen. Esaki ta kondusí na ménos trankilidat den pueblo. Tur hende tin e derechi pa biba trankil i sin miedu. E mester por traha, biba i rekreá sin ta konstantemente pendiente di su seguridat, lokual ta un derechi fundamental di kada siudadano. Ta tarea di gobièrnu pa krea e kondishonnan ku ta garantísá e siudadano e derecho aki.

Tin krímen grandi den nos komunidat ku ainda no a keda solushoná kompletamente i esaki a fortifiká ainda mas e sentido di insecuridat den komunidat.

E gobièrnu aki konsekuentemente lo bai hiba un maneho ku e pueblo por mira i sinti resultado, basá riba un bon balanse entre medidanan preventivo i represivo.

Gobièrnu tin 3 punto di lansa pa loke ta siguridat den nos komunidat:

1. Prevenshon i resosialisashon;
2. Kontrolá kumplimentu di regla i lei a base di sero-toleransia (represhon);
3. Mehorá i fortifiká instansianan den e kadena hudisial.

7.1 Prevenshon i resosialisashon

Prevenshon ta responsabilidat di henter komunidat i ta enserá un maneho ku ta apliká medidanan sistemátiko dirigí pa evitá komportashon desviante. Prevenshon ta eksihí un koperashon di diferente Ministerionan.

Tambe mas polis visibel riba kaya i den tur skina di komunidat pa yuda prevení krímen dor di introdusí e asina yama ‘buurtregisseur’.

Mester sigui ku introdukshon di kámaranan na lugánan stratégiko pa prevenshon.

Kombatimentu di krímen chikí den kuadro di e maneho di sero-toleransia pa yuda evitá krímen mas grandi. Ta instruí Ministerio Públiko pa bai apliká mas kastigunan alternativo segun lei i reglanan eksistente.

Ta studia e posibilidat pa baha e durashon di un asina yamá “strafblad” pa motibu ku esaki ta impedí ku esnan ku a kometé un delito i a resosialisá, ta haña un trabou.

Kombatimentu di kriminalidat, mester tuma lugá huntu ku i mas serka di nos komunidat. Pa e motibu aki sentronan di bario ta haña atenshon speshal pa nan keda mihó uzá pa duna formashon na habitantenan, mayornan i spesialmente na hóbennan. Alabes via e sentronan

di bario lo enbolbí habitantenan, ku konosé mihó ken ta ken den e bario, den kombatimentu di kriminalidat. Pa realisá e tarea aki, ministerio di Hustisia lo presentá proposishonnan, ku ta pidi estrecho koperashon di otro ministerio, por ehèmpel Ministerio di SOAW I OWCS. E kadena hudisial, en espesial instansianan ku tin kontakto direkto ku komunitat, mester ta un ehèmpel (voorbeeldfunktie) pa komunitat en general. Mester fortifiká e relashon entre Kuerpo Polisial i siudadania (en espesial barionan), di forma ku e siudadano por sinti su mes realmente protehá pa Kuerpo Polisial.

Prevenshon i resosialisashon mester ta dirigí pa gran parti riba hóbennan. Den e kuadro aki lo studia e posibilidat pa bini ku e asina yamá “leerwerktrajecten” riba un base militar pa hóbennan ku a bin den kontakto ku hustisia. Banda di esaki lo bini ku diferente otro proyektonan pa prevení i kombatí kriminalidat bou di hóbennan manera p.e.:

- “Kamer begeleid wonen project”
- “Veiligheidshuis”
- Guia pa Prevenshon i Supervision
- Instituto penitenciaro di resosialisashon pa hóbennan
- “Centraal Meldpunt Kinderbescherming”

Ta importante pa fortifiká e funshonamentu di instansianan ku tin como meta, asistí e instituto famia i edukashon di nos mucha i hóbennan manera Voogdijraad i G.V.I.

Mester duna insertivo na sektor privá pa e hóbennan aki realmente por haña un segundo oportunidat. Pa esaki por ta eksitoso mester bini ku programanan di konsentisashon pa komunitat kompletu

Ta revisá nos sistemanan di resosialisashon di esnan ku kometé krímen i bini ku programanan integral mas efektivo pa evitá residivismo. Resosialisashon mester inisiá for di momentu di detenshon. Den e kuadro aki, S.D.K.K. mester wòrdú ekipá pa traha riba e formashon i desaroyo di detenidonan debidamente durante di nan detenshon.

Ta studia posibilidat pa re-introdusí sentronan di edukashon pa nos hóbennan ku no tin un bon guia i formashon na kas.

7.2 Represhon

Represhon mester keda atendé den e kadena hudisial ku ta konsistí di entre otro Polis, Korte, Duana, Kustwacht i Ministerio Públiko.

Den e aspekto di kontrol, e maneho lo ta unu di sero-toleransia. Ta bini ku akshonnan dirigí kontra ilegalidat en general i en espesial kontra poseshon di arma, poseshon di droga, atrako, korupshon, trafikashon di hende, formashon di organisashonnan kriminal, ‘cybercriming’ i permanensia ilegal di estranheronan na Kòrsou.

E maneho di gobièrnutadirigí riba “sero-toleransia” kaminda tin mas polis riba kaya di un forma eficiente pa hasi tareanan di kontrol i mantenshon na un manera visibel i konvinsente. Tambe polis lo mester bai funshoná mas proaktivo basá riba informashon atkerí di fuentenan konfiabel, e asina yamá “informatie gestuurde politie”. Ta bai ekipá tur e instansianan den e kadena hudisial entre otro polis, ministerio públiko, i Korte di Hustisia ku suficiente trahadó kalifiká i tambe material pa atendé ku kriminalidat den nos pais. Ta mehorá mobilidat i kapasidat di vigilansia di polis ku medionan adekuá. Alabes ta hasi uzo intensivo di medionan elektróniko manera vigilansia di kámara, informashon digital i tur otro teknologia nobo/moderno ku lo yuda den kombatimentu di krímen.

Ta bai evaluá i implementá un maneho efektivo i firme pa loke ta trata krímennan di impakto riba nos komunidat manera kiebro i robo di outo, atrako, violensia en general i spesifikamente violensia (seksual) pa ku menornan di edat.

Un otro aspekto masha importante den e kadena hudisial ta korupshon. Korupshon ta mina nos estado di derecho i ta mishi ku medionan finansiero ku lo por a ser destiná pa esnan mas débil den komunidat. Den e kuadro aki lo implementá un maneho firme pa kombatí korupshon.

Por lo demas, pa kombatí kriminalidat ku ta krusa frontera manera entre otro labamentu di plaka, trafikashon di hende, transporte di droga i terorismo lo sigui invertí den lasonan di koperashon den Reino i ku otro paisnan den Region.

7.3 Mehorá i fortifiká instansianan den e kadena hudisial

Hustisia ta kumpli ku su tarea basá riba un maneho di mas año, bon deliniá, konopá na un presupuesto realístico, un asina yamá “verantwoorde beleidsbegroting”. Ku un presupuesto realístico por mehorá i fortifiká e kadena hudisial pa e por funshoná mas efektivo na bienestar di nos komunidat.

Akshon konkretu ku e gobièrnu aki lo bai tuma riba e arena aki ta optimalisashon di e koperashon entre RST i kuerpo polisial lokal.

Pa loke ta trata investigashonnan lokal, esakinan mester tuma lugá bou di responsabilidat di e minister di hustisia di Kòrsou. I pa loke ta trata investigashonnan ku ta krusa frontera e outoridat mester ta kompartí.

Ademas ta bai evaluá i regulá e outoridat di e Minister di Hustisia lokal riba Kustwacht.

A base di e resultado di e evaluashon di e leinan di konsenso ta tuma un desishon final tokante un PG kompartí.

Alabes ta yega na un maneho pa yega na un fórmula SMART di registrashon riba kual tur servisio di hustisia ta konektá i por interkambiá informashon ku otro pa por hisa efisiensia e asina yama Tambe ta evaluá e fórmula mas adekuá pa yega na formashon permanente di e kuerpopolisial pa por brinda mas i mihó servisio na komunidat

Otro aspekto di maneho importante ta esun di imigrashon i atmision. Ta revisá hinter e maneho di imigrashon i atmision, tumando nota di bastante keho i trese modifikashonnan kaminda esaki ta nesesario.

Ta duna mas atension na e maneho di trafikashon di hende. Trafikashon di hende ta un delito serio i ta un violashon grave di e derechonan humano. Eksplotashon di hende ta sosodé den diferente variante i den diferente sektor. E variante mas konosí na Kòrsou ta eksplotashon den e sektor di prostitushon. Diferente víktima, mayoria di biahá ta hende muhé, importá for di un otro pais bou di promesanan falsu. Ora nan yega Kòrsou eksplotadónan, pa saka benefisio ekonomikomáksimo, ta empleá nan bou di sirkunstansianan similar na sklabitut i hopi biahá nan mester hasi otro trabou ku lokual nan a bisa nan promé ku nan partida.

7.4. Fondo di Kriminalidat

Gobièrnu ta evaluá e maneho pa ku fondo di kriminalidat i implementá proseduranan nobo rondó di e fondo menshoná

8. MANEHO DI GOBIÈRNU, PLANIFIKASHON I SERVISIO PÚBLICO (BPD)

Gobièrnu lo aktua konforme prinsipionan di bon gobernashon, e.o. di transparensia, igualdat, integridat, seguridat hудisial, bon motivashon i di konfiansa legítimo. Ministerio di Maneho di Gobernashon, Planifikashon i Servisio Público ta un ministerio ku su tarea di mas importante ta duna servisio. E organisashonnan ku ta kai bou di e ministerio aki tei pa duna servisio tantu na e aparato gubernamental como na público.

8.1 Servisio na público

Gobièrnu ta bai komuniká I duna servisio via di un forma digital. Duna prioridat na introdukshon di "E-Government" di forma integral, basá riba e produktonan ku tin mas petishon for di público.

Gobièrnu ta revisá tur e diferente prosesonan i ta hasi adaptashonnan pa yega na un servisio mas mihó i rápido.

Introdusí sertifikashon di servisio na público segun standard internashonal pa halsa i garantísá kalidat i transparensia.

8.2 Aparato gubernamental en general

Trata e evaluashon di e lei di struktura di gobièrnu ("Landsverordening Ambtelijke Bestuurlijke Organisatie") i implementá eventual rekomendashonnan.

Ta krea oportunidat pa e personal den servisio público por sigui profesionalisá nan mes i asina duna mihó servisio, i alabes krese personalmente tanto na saber como na posishon den e aparato.

Pa loke ta servisio na komunitat gobièrnu ta enfoká riba mehorá atministrashon di gobièrnu i asina mehorá servisio na público, alsa kalidat di servisio na pueblo pa medio di sistemanan moderno, transparente i "online", kaminda e diferente servisionan i departamentonan di gobièrnu ta sinkronisá ku otro na bienestar di komunitat. Analisá tambe e nesesidat di personal i e kompetensia nesesario pa e diferente funshonnan, prinsipalmente e funshonnan na kabes di servisionan (topfuncties) i fortifiká e aparato gubernamental.

8.3 Empleado público

Evaluá e proceso di alokashon di empleado público den e struktura gubernamental i hasi e adaptashonnan nesesario.

Inová manejo di rekursu humano:

- a. Invertí di un forma strukturá den rekursu humano i teknologia;
- b. Introdusí sistemanan di formashon kontinuo basá riba e futuro nesesidat di gobièrnu i pa krea e oportunidat pa e empleado público por sigui forma su mes i maksimalisá su funshonamentu;
- c. Krea insertivonan nobo pa atraé empleadonan nobo;
- d. Sigui atendé kondishonnan di trabou i posishon hurídiko di e empleado público;
- e. Atendé ku urgencia e problemática di empleadonan público ku pa un òf otro motibu ta sintá na kas sin traha.

E minister di BPD ta reuní regular den CGOA ku representantenan sindikal pa atendé e posishon hurídiko di e empleado público.

Mester krea oportunidat obligatorio den e aparato públiko pa studiantenan por kore "stage" i krea kombibensia, struktura i e sentido di responsabilidat pa pasa e konosementu di e empleado público pa medio di un guia profeshonal

8.4 Struktura di gobernashon

Gobièrnu lo sigui ku esfuersonan pa drecha e struktura di gobernashon mediante entre otro siguiente akshonnan:

- Independisá Konseho Supremo Elektoral (KSE) p'asina garantisá independensia, integridat i transparensia den e proseso elektoral.Den e kuadro aki ta enkargá KSE pa krea mas konosementu bou di siudadano di nos demokrasia, sistema elektoral, etc. i krea tambe un "kas di demokrasia".
- Trata e evaluashon hasí pa SOAB di e struktura gubernamental na nivel di Ministerio ("businessplan") i hasi e adaptashon nesesario ku bista riba optimalisashon di e proseso di tomo di desishon I implementá e kambionan palabra mas pronto posibel.
- Digitalisá e archivo gubernamental pa alsa aksesibilidat di dokumentonan pa por optimalisá funshonamentu di gobièrnu i servisio na públiko.

8.5 Centraal Bureau voor de Statistik (CBS)

Centraal Bureau voor de Statistik (CBS) mester bira un órgano independiente konforme rekomendashon di entre otro Transparency International, pa yuda ku inisiativanan di maneho pa gobièrnu i asina asistí ku retonan di nos komunitat.

9. FINANSA

9.1 General

E maneho general di finansapúblicoúltimo tempu tabata unu dirigí riba saneamentu p'asina alkansá un situashon finansiero saludabel i duradero pa por sostené un ekonomia dentro di e kuadro di e normanan presupuestario.

Finansa públiko i e instrumentonan ku esaki ta brinda pa maneho, ta keda atendé i apliká pa sirbi e hende i pues mester ser dirigí primariamente na sostené un desaroyo ekónomiko i sosial sano i duradero i konsekuentemente pues riba e base aki di un forma hustu i realístiko, krea i aloká medionanan skars pa sirbi e hende, su desaroyo i su bienestar.

Naturalmente e gobièrnu aki ta rekonosé e prinsipio di un presupuesto balansá i lo sigui hasi tur esfuerzo pa mantené esaki asina konforme norma- i reglanan establesé den nos leinan eksistente. Gobièrnu ta mantené nan mes den e kuadro aki na e norma di presupuesto balansa, kumpli ku lei pa loke ta kuota di interes i adishonalmente konsiderá introdukshon di un kuota di debe ankrá den lei konforme normanan internashonal.

9.2 Presupuesto balansá

E maneho di presupuesto ta unu kaminda tur esfuerzo ta keda hasi pa entrada i salida di gobièrnu pa lokual ta gastunan koriente ("gewone dienst") keda den balanse òf ekilibrá ("sluitende begroting").

Máximo esfuerzo lo keda hasi tambe pa redusí gastunan innesesario i asina krea espasio pa por invertí den otro área(nan) na bienestar di e hende ("flankerend beleid") i mehora servisio pa públiko.

9.3 Maneho Finansiero ("Financieel Beheer")

Un maneho finansiero sano ta esencial pa sigui kumpli ku tur otro meta di maneho gubernamental. Gobièrnu lo kontinuá e liña pa stabilisá e situashon finansiero públiko i duna kuenta i rason na pueblo via relatonan anual. Tambe lo kontinuá ku e proseso pa reforsá den tur su formanan e disciplina di presupuesto i alabes tambe bin ku suficiente heramentu pa por tene hende responsabel ("accountable") pa violashon di reglanan i leinan di kontabilidat di Pais ku por a okashoná daño na Kòrsou.

9.4 Oumentá entrada

Gobièrnu ta bai generá mas entrada pa aplikando un mihó maneho di kobransa di belasten, mihó kontròl i mas efisiensia (e.o pa medio di mas outomatisashon). En breve lo bai evaluá i kaminda ta nesesario mehorá i reforsá e "tax compliance" eksistente.

Implementando insentivonan fiskal ta un forma pa sostené desaroyo ekónomiko loke ta resultá den mas ingreso di impuesto.

E asina yama “Legesverordening” ta keda revisá p’asina garantísá ku pago pa pèrmitnan ta tuma lugá di un forma eficiente i servisial na e servisio konserní.

Pa loke ta trata entradanan no fiskal di gobièrnu, ta kontinuá ku e proseso pa via di strukturanan legal eksistente, introdusí normanan finansiero i di prestashon pa instansianan i empresanangubernamental. Esaki mester kondusí na redukshon di nan gastu, mehorashon di nan servisio na públiko i konsekuentemente mas dividendo di un forma konsistente pa gobièrnu.

9.5 Redusí Gastu

Partidonan lo hasi estudionan pa baha gastu innesesario i evitabel di gobièrnu i di su institutonan i empresanan. E último nan aki lo tuma lugá pa medio di normanan di funshonamentu instituí via di struktura(nan) legal eksistente ku mester kondusí na redukshon di nan gastunan, mehorashon di nan servisio i konsekuentemente mas dividendo di un forma konsistente na goberná.

Pa medio di maneho di supsidio di gobièrnupromové efisiensia finansiero pa instansianan ku ta risibísupsidio di gobièrnu. Kaminda ta aplikabel promové integrashon di institutonan ku ta brinda servisio similar.

Pa logra redusí gastu ta bini ku un maneho pa entre otro e gastunan na ‘consultancy’, frena uso di ‘uitzendbureau’ den servisionan kaminda en realitat ta rekerí trahadó den funshon permanente, baha gastunan di overtaim i empoderá i reforsá órganonan di kontròl di moda ku por tin un kontròl mas eficiente den gobièrnu i di empresanan ku ta kai bou di gobièrnu òf ku ta risibí supsidio di gobièrnu.

9.6 Kámara di Presupuesto (“begrotingskamer”)

Den kuadro di karga responsabilidat finansiero propio, mester ankra den nos propio leinan un órgano pa supervishon finansiero; e asina yama Kámara di Presupuesto (“Begrotingskamer”). E kámara aki mester pèrmití pais mantené e situashon finansiero sano, saludabel i duradero. Esaki hasiendo uso di tur otro instrumentonan legal manera e.o. e lei riba disciplina di presupuesto.

9.7 Banko Sentral

Tur esfuerso ta keda hasi pa restableséimágen di Banko Sentral di Kòrsou i St. Maarten tantu riba tereno lokal i internashonal.

Banko sentral kompartí: ta tuma pasonan pa evaluá e funshonamentu di Banko Sentral kompartí basá riba rekomendashonnan di rapòrtnan eksistente.

9.8 Impuesto

Último tempu e maneho fiskal tabata dirigí na generá mas entrada i kontinuá ku simplifikashon di impuesto. E maneho nobo lo ta unu ku ta dirigí pa a traves di e instrumento fiskal indusí kontribuí i sostené krelementu ekonómiko.

Entre otro lo studia posibilidatnan pa redukshon di impuesto i òf krea insentivonan fiskal ku no solamente ta indusí i sostené krelementu, sino tambe ku ta aliviá i oumentá e forsa di kompra di e siudadano.

Konkretamente tambe lo krea insentivo di impuesto como instrumento sosial i ekonómiko den áreanan spesífiko manera entre otro Punda i Otrobanda.

9.9 Sektor finansiero internashonal

Hopi kambio a tuma lugá den e sektor finansiero internashonal, prinsipalmente riba tereno di “off-shore” ku tin su impaktonan riba nos tambe aki na Kòrsou. Nos sektor finansiero internashonal ta un fuente di entrada i empleo ku ainda tin su importansia. E sektor aki ta sòru tambe pa divisa.

Ku bista riba 2019 gobièrnu lo tin kontakto intensivo ku e grupo aki pa komprondé nan nesesidatnan i kaminda ta posibel tradusí esaki den sosten na e sektor i desaroyo di produktonan nobo den kuadro e realidat nobo ku ta más “on-shore” kaminda “compliance”, “transparency” i “substance” ta importante.

9.10 Tratadonan fiskal internashonal

Pa evitá “impuesto dòbel” ta hasi esfuerzo pa sera akuerdonan fiskal ku otro paisnan ku enfoke riba Latino Amérika. Pa logra esaki tambe mester promové interkambio i informashon di impuesto, basá riba normanan di Organisation for Economic Co-operation and Development.

9.11 Duana

E política di duana lo ta primariamente dirigí na reforsá e maneho i e organisashon riba e tereno aki pa asina por evitá desviashon i eskvashon di impuesto den pais.

Mester reforsá e kontrol di nos frontera (Haf , DOK , Vrije Zone, Aeropuerto, etc) i huntu ku otro instansianan relevante manera Imigrashon, Kustwacht etcredusí i te kaminda por eliminá trafikashon ilegal di hende, droga, arma i otro produktonan.

Tambe mester pone mas atenshon na mantension i ampliashon di kontakto riba tereno di duana.

Finalmente ta importante pa sera tratadonan di “duana” pa asina paisnan preferensial ofresé e tarifanan di aksesu liber na merkado pa produktonan di importashon.

9.12 Sektor weganan di plaka

Realisashon desidido di regulashon apropiá i supervishon uniforme profesional riba e sektor di weganan di plaka kompletu ta esensial pa rekuperá e bon reputashon internashonal di

Kòrsou. Den e kuadro aki lo hiba un maneho pa kombatí labamentu di plaka atraves di sektor di weganan di plaka i krea mas fondo pa kombatí adikshon na weganan di plaka.

E sektor di loteria ta haña e atenshon nesesario pa minimalisá ilegalidat i konsekuentemente subi entrada pa gobièrnu. Esaki ta enserá entre otro finalisashon di e proyekto di outomatisashon di wega di number.

Integrashon di e órgananonan di loteria ta di sumo importansia i como tal mester sigui kana e kaminda di integrashon i supervishon optimal den tur e órgananon.

9.13 Good Corporate Governance.

Implementá rekomendashonnan di e rapòrt ku a evaluá Good Corporate Governance-code(rapòrt Willem). Den e kuadro aki ta revisá i fortifiká e lei di tal manera ku por kumpli ku e meta ku tabatin destiná ku e instituto SBTNO.